



癸巳類稿卷八


黟縣山水記

黟縣山起楠木嶺脈來自休寧發源界之張公山故黟地也今嶺在縣東南三十五里南則祁門界嶺東北為天潛山西北則黃荆菴山又西北為南屏山山在縣南十里自北望之平起方疊如屏亦曰城子山其上峭壁斗巖石竇間有龍湫亢旱禱之輒應上有龍門道院邑志云南屏實南嶽祖脈相地家言也西為頂遊山東為林厯山元和郡縣志云林厯山在縣南百五十里今山在縣南十里依山北百五十里無唐黟治此志誤也山高二百初周十里三面壁立徑危仄漢末黟賊帥陳僕祖山等二萬戶屯其中建安十三年吳將賀齊討平之史言如此疑癸巳類稿卷八

卷八

一
分
三

陳僕祖山非賊也保山以禦亂尙未屬吳耳云二萬戶并計山下附之者山上為帥居也今山上寨址猶存鉅山者時得箭鏃嘗求得之小方而銳銅色紅翠隱然土人卽山為庵宇明時有林厯書院曰道一堂今不可見庵前有峰員起如香鑪水經注云地理志漸江水出丹陽黟縣南鐘夷中北逕其縣南有博山山上有石特起十丈上峰若劍杪時有靈鼓潛發正長臨縣以山鼓為候博山蓋鑪象矣山之東為垂珠洞洞窈窕石骨相次卽石刻佛像泉白石出四時滴瀝洞口地層出可眺覽嘗與古築孫君學道田段程君驥登此程君有詩又與崇義方君變深陽陳君棻登之方君有詩其西有瀑布自千丈崖下下有石曲環如象垂鼻瀑布由環出上有仙人棋局石曰入夜或見金燈如流星千百飛墜滿野吳時殺賊萬餘爾後山空無人居血結



起爲嶙嶙陰相沿鬼火赴此如人赴集場不足怪矣迤西則頂
遊山山東北至縣十二里一曰丁峰亦曰南山程君驥登此山
言自下至上可十里上頂可容兩席地自東北望之甚銳山形
如楷字由形者余言此當是丁由山程君曰不然舊有頂遊大
王廟古人稱名之意不可知也又西北山陰爲赤嶺山南爲陶
嶺通祁門又西北爲觀兩筆字亦作壑音追余見官書麟冊如
此又西北爲簸箕塢又西北爲武亭山山東北至縣十八里邑
志云高二百仞西接祁門界山陰武林水出焉山故凹凸出入
亦曰武陵唐地理志云歙州祁門縣有武陵嶺元和中令路夏
鑿石爲盤道宋紹興時黃村黃葆光又就樵徑開通之繼有石
磴自乾隆二十六年安慶爲省會邑中士夫文書皆繇此道黟
田少常繹米鄱陽自祁門排溪擔負者皆過此古築孫洪維易
癸巳類稿

卷八

以大平石修茶亭爲往來坦途矣又北行爲石母山嘗以重九
與官路下汪君步鼇登此盡望見縣南山內地又北爲虎嶺山
西接祁門界虎嶺武嶺疑是唐時官私之名舊時黟祁路在此
虎嶺下達於排溪余家先世有墓在嶺西年年過此嘗疑此嶺
爲路令舊蹟惜志乘不能詳也又北行爲畫工尖脊秀似刻畫
者又北行屬之西山由縣西望之如屏疊翠千雲特爲明秀或
曰仙山上有石中文長尺餘如足迹趾南踵北相傳爲仙人迹
旁有杖痕又北行爲釣魚嶺一曰相見山山路迴環行久之乃
至舊處對塢而里數已遠故曰相見樵徑皆然也此爲葉村孔
道又東北行爲方家嶺徑大屋道也又東北行東南起高峰
曰發龍嶺又東南下行爲千絲隊又東南起爲美箇山山自楠
木嶺層巒相屬脈絡甄明大峰突聳如靈鷲振翮獨昂雲霄又

東南爲芙蓉嶂自嶂東南至縣十二里穹岫巖整衆山環拱其陽奇木錦繁靈石棋分自此東南岡阜起伏爲雄雞峰逕南坑綿延至東嶽行祠曰龍尾山上有聖母池碧霞元君祠祠北爲觀音巖東爲靈虛觀觀前石華表上嵌石扁宋大觀元年朱彥記云此地去縣一里許龍尾山環之事載圖經明正德十六年縣中修觀爲記其事是龍尾山名見宋前圖經明正德十六年縣志亦云東嶽行祠在龍尾山今府縣志僅謂之東嶽山矣觀東北有社公祠曰龍尾大社山又東北行當縣城南門西縣城循山東北麓屬之章水府縣志言城包羅東嶽山非也舊唐書地理志云黔置在黔川卽今城東北之水矣城內山東北行者爲城隍山東行者爲縣學山

自楠木嶺東北分行者曰天潛山志云以多隱君子讀書其中癸巳類稿

卷八

三
廿一

故名亦曰石林山有蒼霞凹指月尖日月關諸勝下有潭曰空心潭左爲佛頭嶺其行七里皆老松蒼翠亂雲煙有蒼蒼亭上爲鬱確屏取孔叢邱陵歌唱然回慮題彼泰山鬱確其高梁甫迴連義也登屏山爲觀海臺謂雲出鋪海也下循溪爲偏閣左行爲天蒼街街轉則天蒼巖天蒼者響山也又東爲牌嶺牌嶺東屬之休寧齊雲山牌嶺東北行爲復山復山在縣東南三十里高二百六十仞峰孤峻石壁四絕初學記引輿地志云有五硯二磔亦謂之五硯磔注云硯下根反從良得聲今諸書從頁非也太平寰宇記亦作五硯二磔硯磔旁皆有石壇中央有溝才五六尺許水懸出捫蘿挽葛時有至者山陰曰復巖聳翠激流至其上石壁立天際如太古朽木如赭石畫平嶂舊鄉民避寇巖上寇以山上無水思久圍困之鄉民投下生魚示之乃

引去福建德化縣志云酒鑿寨山在縣西高峻之水昔人避賊
賊以久圍困之有女子取酒浣衣以示賊賊謂水多也因解圍
去事亦類此天潛山之西有山逕水村考川下插坑屬之李村
自林厓山東北分行連山相屬三里許有金竹巖羊腸鳥道上
通樵路嘗與程君驥夜飲金竹庵月中上望山巔石亭旁有虎
次曰問之樵人無見也又東爲黃家嶺十里至竹山下會石山
林厓山東行者爲青嶺山亦曰千里山越所據今居民於山
巔植松檜禁樵伐隔山望之林木蔥蔚在雲間亦仙境也青嶺
山東行爲黛峰峰有塔院塔七級踞石巔下臨水其山陽爲從
坑爲託坑山陰爲規窰青嶺山陽東行者爲喬嶺爲魚亭山咸
瀉志云婺源浙源山北通黟縣魚亭山是也山在縣東南三十
五里高二百五十仞

癸巳類稿

卷八

四
X
X
X

自南屏山東北分行爲大星山山有大石言是落星所成一曰
大仙山

自虎嶺東南分行爲上堂山宋紹興二十七年靈惠廟碑云其
神謂之胥公乾道二年二月一日敕封顯應侯今居民謂之胥
王廟山名志乘不載孫君學道讀碑知之

自畫工尖東南分行連岡複阜一屬之黃村一屬之古築古築
村東曰東山巨石谿舒桐桂交蔭有泉出石間曰石乳泉泉南
有亭曰石乳亭

自西山南分行逕上江村東南逕下江村陳閭張墩屬之余汪

村

自釣魚嶺西北分行逕葉村北屬之猷徑山

自方家嶺西分行爲程家山東南逕豐口石柳山方家嶺東北

行爲霽巖北逕黃泥坑大星柱杖屬之石埭廂口

白雄雞峰西分行爲金雞石其南行者一逕灣裏後闕閭山屬之後溪一逕撒家黨屬之月塘一白南坑西行逕七星墩五里牌舒家林黃柏塢屬之鐘山

自龍尾山北分行逕西門亭屬之鉅鉢山其東行者一逕石亭東南行爲舊庵山爲鉅窰山一逕靈虛觀南行屬之程家莊一逕將軍嶺將軍嶺者吳將軍賀齊廟在焉詩山越者也將軍嶺東南行爲鼓樓嶺在今縣城東五里隋海寧縣舊城也嶺東南屬之橫岡前爲橫岡水矣

自方家嶺大山至霽巖東行西轉爲石鉢孟山高五百仞延袤三十里有巨石廣數十丈中坳如孟孟中雲起則天雨謬云石孟戴帽田不慮燥又西南行爲碧山有泉名靈惠清冽異於

癸巳類稿

卷八

五

常泉山面東南高百仞與霽峰尖對峙自魚亭入黟至石山始開陽西北望碧山峰環百里此山爲鎮矣山麓舊有太白樓或言唐李白常樓此白終南詩云暮從碧山下山月隨人歸碧山乃終南謂黟碧山事莫能明宋羅願以至黟欽之李白爲南唐學士李白事近實矣石鉢孟山又東爲章山山在縣西北二十里其麓章水出焉循水西南出爲規溪山逕石亭屬之歷下榆村麻田蔡村江家埭沙田章山東行爲九龍山南行逕白千麓下四嶺九蓮山屬之古城村章山北行爲長坑山屬之太平米坑章山東北行爲太陰尖在縣北二十里其山面北前有官鋪田自太陰尖南行爲石油山有山庵宋嘉定時建或云其時山石出油供僧廚僧欲以賣錢油乃不出今流泉尚有油香斷碑猶存按續漢郡國志酒泉郡延壽縣注云縣南有山石出泉肥

如糞肉泊如不凝膏謂之石漆酉陽雜俎物異云高奴石脂水如漆可膏車然燧石油益此類夢溪筆談言石油似清漆延安府志云延川縣北九十里有石油井出石油六月收以塗瘡疔亦曰脂水亦曰石液南雄州志云州東北百二十里有油山高數十仞旁有小穴出油人取以爲利蓋所在有之石油山南行爲風來嶺風來嶺南爲戢兵山一曰戢矢山在縣北十五里舊曰石鼓山高百仞周十里新安志云唐天寶六年改爲戢兵引邑圖云有石如鼓有石人石驢諺言鼓鳴則驢鳴人哭而長官不利後鑿破遂不復鳴按太平廣記引歙州圖經文與邑圖同則鼓破在唐以前矣自石鼓山一南行逕輞里北莊屬之軸上山水光色如展軸看畫焉一東南行逕嶺下至屏山山椒倚上其上疊石積翠東南行爲吉陽山吉陽山在縣東北十五里新

癸巳類稿

卷八

六

安志云高二百五十仞周三十五里上有三峰並起斜倚如積髻曰三姑尖初學記引輿地志亦謂之靈山山多石三年一遇野火盡燒故老謂之三姑磨新安志云若非磨年百姓放火輒有雨滅之按磨讀折磨之磨佛家謂之魔劫神仙謂之厄會皆以年紀也新安志又云中峰有瀑布泉寰宇記云吉陽水出焉又引新安記天將雨此山先有鼓角之音人以為準亦曰東山有仙人石仙人盤邑人舒道翁遇異人傳養生訣構庵山前時有雙鶴來往之異吉陽山東爲石印山山上有石平方特起下有石燕洞幽邃可容百人昔有頭陀居此每擊磬則羣蛇出赴洞西有產龍石石分列一在山下一在山上上有凹龍形自吉陽南行之山盡石山埕秀橋與竹山下對峙吉陽山東行爲東文嶺一曰東頭嶺又南行逕朱嶺下屬之石山東南行逕西遞東

爲長濱嶺故魚亭道也又南行一屬之循洋臺與黛峰對岸或以爲湯陽岱峰蓋行人游戲之目黛峰青嶺相接以石色言循洋水較深矣長濱嶺南一東行屬之嶺山卽黟山水經注云浙江又北歷黟山縣居山之陽故縣氏之其說是而此山素不表見也山亦曰石墨嶺下有井寰宇記云在縣南十六里是昔采墨之所今爲懸水所漂其井轉深卽今墨穴也今采其墨僅染阜耳按舊唐書地理志云黟漢縣屬丹陽郡晉同黟縣南墨林山出石墨故也今求晉同黟縣事無所出當是音同黟之誤其言黟縣之名由墨嶺是古說本取黟山爲義元和郡縣志亦云縣南有墨嶺出墨石又昔貢柿心水縣由此得名是唐時以石墨爲可用之物可書字由述之者不明顯著書者以意度之實則石墨卽石炭今似借字爲煤黟已惟此有煤又煤苗不盛矣已類稿

卷八

七

稍采入卽爲懸水所漂利小而害大此古事之鑑江南西道煤所在有之不聞以名縣尤不聞以染阜也石墨嶺上或言亦有靈鼓潛發令長候之以占吉凶又東行爲樵貴谷按寰宇記引輿地志言樵貴谷在黟北昔人入山七日至一穴豁然盡開周三十里中有十餘家是秦人避地者新安志亦同今縣北二都言有樵貴谷地與古應墨嶺下實在縣東南而深山峻谷林樾秀朗亦靈境也元孔齊至正直筆云潘教授言縣有深山入可數百里老民百二三十歲嘗見大木片長數丈廣二三丈木釘相連不用鐵土民不食鹽醬寰宇記又引邑圖有潛村入石洞口悉爲松蘿所翳每求鹽米晨出宋時見有數十家同爲一村新安志姓氏云號爲潛氏迄宋潛姓數十家南唐劉崇運金華子雜編云嘗有新安人說本邑深山中有一水居人飲此水

率皆長壽儘有二百歲者鄉人謂爲仙源是亦潛村之類康熙
時府志則云縣地不及百里豈有山行七日之遠不悟山行多
曲巖壑杳深踰澗攀崖百里之間彌歲難窮宋人言之猶是述
古人方言近事靈異遊蹤非俗情所當糾也汪君文臺云梁
書海南傳云黃武五年大秦賈人秦倫至交趾送詣權時諸葛
恪討丹陽獲夥斂短人權以男女各十人送倫南史亦同按黃
武五年全琮討山越恪後九年嘉禾三年討山越六年平之則
黃武五年不當有恪所獲蓋全琮越俚之短者非別有短種古
事或記載未審不當糾也石壘嶺又南行爲石門山山在縣東
南二十里壁立數百仞下瞰溪潭鑿石爲門開一徑僅通入石
絕處橫貫木置板以行曰棧閣石門一曰小劔門宋建中靖國
時有縣令朱天錫題字今燒鑿山石易以石道又南行爲桃源
癸巳類稿 卷八 八

八
カ
シ
ク

洞山骨秀出臨水道鑿石入五尺許就石崖突出處爲屋於門
題之爲洞府縣往來官路也自樵貴谷東行南屬之石門坦自
東頭嶺東爲源嶺又東南爲靄山山在縣東南二十里其峰巖
重如人大坐又東南爲嚴嶺屬之噫潭自嚴嶺南行爲艾坑一
西南行爲靄岡一南行爲張坑一東南行屬之界首休寧界自
石鼓山東行者爲北莊嶺東北屬之奇墅白太陰尖西北行者
爲五溪山山在縣北六十里山北有五溪常有雲氣隱蔽其上
山半有石崖下有龍湫歲旱禱者以壺取水水涌壺中者霖雨
隨至其北屬之太平界五溪山陰舊屬石埭秋浦後集云五溪
山在縣南百二十里上有五溪合流而下歸於舒溪至魯港入
江是也太陰尖東北行者爲羊棧嶺踰嶺程十五里嶺北有數
十家曰樵樹下亦曰朮曙朮樹朮曙音相亂也白江亭至朮

羊棧爲捷道向置鋪遞府志云寇自池發者警先謦謂此路也
又北屬之太平油竹坑羊棧嶺南有石門嶺巖石深峭春雨後
瀑布懸飛有勝致羊棧嶺東行爲牛泉山在縣東北五十七
里志云高九百五十仞寰宇記引輿地志云牛泉嶺通廣陽縣
自下上九里一頓凡九頓山常風樹合抱而高不至丈當頂有
泉方丈餘俗云牛跑所致亦猶虎跑泉也山上僅通樵經雖盛
夏亦衣襦側徑時有甃石處蓋舊通廣陽道廣陽卽南陽隋唐
縣唐省入涇卽今石埭西北之陵陽矣其北則爲牛泉坑其南
爲鬯溪源牛泉山南行爲黃堆山在縣北三十里山頂平曠
昔泗州西峰五溪結茅於此曰西林寺今山上有大聖庵四林
遺址也黃堆山南行爲雷阜屬之雷岡頂黃堆山東北行屬之
厯舍黃堆山東行爲梓嶺下爲梓路寺南屬之東山珠嶺黃堆

癸巳類稿

卷八

九
八
上
川

山北東行者屬之休寧潘村自梓嶺東南行一屬之潭口一屬
之珠川一屬之大周山山在縣東南二十二里石壁幽峭芳叢
藹坂香潔靜明延佇者忘疲矣一屬之天井山山在縣東南二
十五里山麓有府均井禱雨有驗曰府均勝井府均之名莫
能明也又南行逕程村屬之休寧西源嶺自黃堆山北行者逕
里仁屬之休寧雙嶺又東爲黃山自楠木嶺至此岡巒連絡不
斷迴環盤互止一山也其上自楠木嶺至方家嶺爲寧國山行
脈自楠木嶺至雙嶺爲杭州山行脈
黟縣水有六一會於石山曰章山南水曰石鼓山水吉陽山西
水曰方家嶺南水西武嶺水一會於魚亭曰石山水曰潘山水
託坑水曰金村水插坑水石門坦水曰魚亭水一會於靄岡曰
魚亭水曰靄山水一會於休寧東亭橋曰羊棧嶺南水吉陽山

東水一會於休寧東夾溪橋曰東坑水而東亭以上水會之以下爲新安江一會於石埭河口曰方家嶺北水曰章山北水曰羊棧嶺北水皆入大江

章山水漢志所謂漸水也其南源南行逕章溪過水口廟下石鉢盂山水自西北來入之南逕規溪山石壑礫水行如在規中出規溪尼菴西石壁有宋汪綱等遊記下過西門橋逕何村爲放生處溪水淳流魚聚影焉東南逕歷下舊曰歷陽里有唐建精林院又東南逕榆村又東南合石鉢盂山西水曰雙溪石鉢盂山西水東南行東北納霽頭水逕芙蓉嶂東下爲塌口又東南逕百戶村百戶村有三明王用從太祖戰死敵世襲百戶子孫以爵名村矣又東逕黃衣担又東入章水爲雙溪雙溪下有石堤捍水使北明嘉靖時工也堤之西南有梁時舊注入今城

癸巳類稿

卷八

十一
石埭川

西北隅出今迎靄門右東達於黃姑墅以溉田曰橫溝今溝上皆民居歲二月穉濟以爲常章水循堤東北行至和尙塍塍所以護廣安寺後地畝也初章水曰缸鉢山下至今城西北一由東北出廣安寺後自堤成而水俱北行塍成而水折而東南逕城北門廣安寺前又東逕東門梅溪又東南至江家段沙田而會石鼓山水吉陽山西水

石鼓山水出山南行風來嶺水自北來入之又南行蓬下水自西北來入之又東南行北莊水自北來入之又東南逕朱村屏山水自西北來入之又東行爲吉陽山西水吉陽山亦曰三姑山黟縣山水絕略云昔有三女飛行吉陽水上或叩之曰余石埭人也遂不見水上有三鯉魚余按陶潛搜神後記任昉述異記文選劉孝標重荅劉沼書注引宣城記並云宣城臨城縣

蓋山上有池舒姑者性嗜聲音化爲水間歌則泉涌洄流有朱
鯉一雙以圖書證之爲今石埭舒姑山吉陽水上三女子殆舒
姑歟又西南行逕古城又南行逕古溪獅坑水古城水自西來
入之田段程君驥葉村葉君有廣好小學及地里嘗得古溪西
故渠窪地溯行過高圻至廣安寺後長生橋曰古章水分出此
故舊志乘言夥者若元豐九域志以吉陽爲黟川所合多也今
則章水源遠而合多吉陽入章水矣石鼓山水吉陽水自古溪
南行至沙田入章水又南行逕東山下過橫岡橋東會方家嶺
南水西武嶺水

方家嶺南水出嶺南其東源許思塢西源冷水坑合流東南逕
程家山又南逕豐口爲豐溪又南逕胡村納霍溪水霍溪水出
釣魚嶺北會於胡村南行逕後闡又東南逕陳閭山下又東南

矣已類稿

卷八

土

分上

逕後溪至余村月塘水自西南來入之西合西武嶺水西武嶺
名武亭山一名武林山謂浙武林水出此一名武陵山謂水爲
武陵源夥有桃源之稱由武陵也水出嶺下東北東逕官路下
又東畫工尖南水虎嶺水泉石嶺水自北來入之又東行北納
黃村水南納赤嶺水又東行逕古築頂遊山水逕下洪山來入
之畫工尖北水自西北逕烏石注西干田舍來入之又東行陶
村水自南來入之陶村在頂遊山東北其居曰五柳舍靖節里
蓋淵明後裔又東行過古村心驛北過萬松橋橋材言一石成
之石由蛟水送至嘗過其橋三空工緻採欄階割切石材八
百餘其事可言奇矣橋南有萬松亭旁有醴泉其地獨高南屏
山水自南來入之又東行林厓山水自南來入之南眺博山去
水不遠程君驥言水經漸江注云逕其縣南博山讀史方輿紀

要浙江海引防險說云浙江之源始於黟之林厯山一線之源合流萬壑是依酈道元言浙源爲武嶺水程君居田段葉君居村心孫君學道居古築三人皆能道古皆家臨此水共持此議水又東行至汪村合方家嶺南水逕余村東余村於此構雙溪書屋又東行逕田段北又東行過閭揭舒家林水舊庵水自北來入之閭揭當縣治南古橫江所由名也瀾文波色有浩渺煙霞之觀矣又東北行過葉家灣會章山南水石鼓山水吉陽山

西水東行至石山

石山會諸水在縣東南十里連山夾峙播液發靈清淺則鳴漱盈滿則奔駛東至潘山東頭嶺水自北來會之

潘山水出東頭嶺南逕西遞東又南行西遞西水自北來入之西遞在府西舊爲鋪遞所由東頭嶺東路則出東亭橋西遞水

矣巳類稿

卷八

三

又南行長嶺嶺西水自東來入之山壞樹木蒙密春花上浮木杪望之不見土石又南過十里鋪橋又南行出潘山東行合石山上水託坑水自南來入之又東行逕黨峰下望塔院趾盤嶠旌東逕規竈迴沈澹滄最深靜處也金村水自北來入之金村水出長嶺嶺南會石墨嶺西水逕金村出規竈會經流東行逕循洋臺山後舊有龍屯依山踞崖泓水澄澈人屢擾之龍乃徙去循洋水中釣臺矗立波際乾隆戊申邑人王穀程學禧胡德講等於崖間新開魚亭路構亭以息行人轡影送青波光激素負擔息肩者亦踏足掉頭若有評賞則知雲水怡曠智愚同心矣又東逕金鐘潭俗言黃堆山西林寺舊有金鐘朝旨昇進鐘至此入水金石交不解遂棄之山水相遭自傳空籟耳佞佛之言固難究詰也又東行石墨嶺東水自北逕樵貴谷來入

之其地舊有桃源書院歲久傾廢又東逕桃源洞下又東插坑水自南來入之又東南逕石門坦石門山水自北來入之又東南行至魚亭會魚亭水亭在縣東南三十里在魚亭山北五里竇宇記云西江魚船至祁門縣舍舟登陸止此東水次淹留待船故云魚亭咸淳志云黟舊有四亭八壑魚亭其一也方輿家以爲停留之停未知是否按魚亭之魚必不指西江魚船若亭壑之亭本是停留之義亦不須疑也八壑今止有奇壑

魚亭水出楠木嶺東行至水村會黃荆庵山青嶺山水東行逕喬嶺瑪川至魚亭出永濟橋東南逕攏風灘灘上舊植柳數百株會經流東南行考川水自西南逕李村來入之牌嶺水自南逕霞阜來入之又東南會靄岡水

靄岡水出源嶺南逕上坑又東南逕靄山東又東南逕苦竹林

矣已類稿

卷八

三〇〇

又南逕艾坑又南至靄岡會經流又東行復山水自南來入之又東入休寧界

休寧東亭橋在黟界東十里故黟地也納黟羊棧嶺南水水出嶺南南行逕盧村考溪源水自西北來入之又南逕際村邕溪源水自東北來入之又東南行十都南湖水自北來入之南湖者十都引邕溪水環注村中而潑於湖上植桃柳其水淵渟荷菱發香鱗遊不滄湖東偏有石特高起湖水由堤下出又東南行橫山梓嶺水自東北來入之又東逕東山下北莊嶺北水自南來入之又東過珠嶺下裏田方坑水自東北來入之又東逕奇壑又東爲魚山溪又東逕社禾木坑水自北來入之吉陽山東水自南來入之又東南逕潭口阜嶺水自北來入之又東行珠川水自北來入之又東南逕木魚大塢水自西來入之又東

逕王村王塢葉村水自北來入之又東南行源嶺東南水吳村
水自西來入之又南逕程村府均水自北來入之又南逕噓潭
潭在縣東南三十五里石壁削立水觸石盤渦面狹底闊深不
知尋丈宋嘉定時歲旱郡守禱祀得雨爲立龍神祠潭南岸有
怪石三數卓立如人鄉人呼爲石新婦又南行出東亭橋休寧
謂之北源水至白茅渡會霽岡以上水新安志記吉陽水云至
白茅渡入縣界專言吉陽水者時章水入吉陽也云入縣界者
蓋休寧記納黟水之文羅君誤編入黟縣中其致誤之由可知
今府縣志乃言吉陽水過噓潭白茅渡會橫江章水出石山是
讀宋人之書而不知其意又不知吉陽有東西兩水而移噓潭
白茅渡於古城古溪沙田之間不辨地里所在矣

休寧東夾溪橋在黟縣界東三十八里故黟地納黟東坑水水
癸巳類稿

卷八

西
八

出東坑東行逕里仁又東南行夾溪歷舍水自西來入之又東
南行梓坑水自西來入之又東行入休寧潘村界阜嶺北水自
南來入之又東逕休寧藍田出東夾溪橋休寧謂之夾源水會
東亭以上水東行爲新安江下爲浙江古漸江水也漢書地理
志云丹陽黟縣漸江水出南蠻夷中宋祁校云漸水入沅疑此
無漸水漸字當作浙字此宋時官校交誤者之妄也羅願新安
志云漢志蠻夷中唐盧播注山海經引之作率山今休寧張公
山與山海經合說文云漸水出丹陽黟南蠻中戴氏震云漢志
夷字衍蠻中應作率山今檢漢書地理志言出徼外出塞外者
水首見此縣而源在徼塞外也其源在此縣而地未闕者則言
出蠻夷中北地郡歸德縣云洛水出北蠻夷中郁郅縣云泥水
出北蠻夷中漁陽郡自檀縣云濡水出北蠻夷中

此濡卽灤唐
水誤作漁風

注鴨反此依水經滿與此南蠻夷中相對知蠻非率誤中非

水注引是晉魏時本
山誤夷字非衍說文落夷字耳言蠻夷者吳志屢言討平山越
後漢書度尚傳言杭徐試宣城長悉移深林遠藪椎髻烏語之
人置於縣下由是境內無復盜漢時南方置縣皆大如今湖南
地兼苗族臺灣地兼番族時山越卽蠻夷由戶籍不同今張公
山自有水入浙江校量道里章水源更遠也

會於石埭河口者黟之方家嶺北水水北行逕王村又逕洪徑
墩上水自南來入之昔嘗讀書洪徑汪氏莊屋在水東常倚徙
橋上俯視碧流澄澈念謝華威秀有義山語云長溪清薄流影
不去文境符合而李義山集中無此語蓋佚篇矣又北逕大星
其北雙河口葉村水自西來入之葉村山水做靜夏夜無蠶
又自雙河口東行至柱杖村石埭大猗嶺西北水自西南來入
癸巳類稿 卷八 五

之及西北行至廂口又西北行至太平林村章山北水自南來
入之

章山北水北逕章溪出水案有長坑水自西來入之五溪山水
自東來入之又北逕太平登塔橋會於林村又會於石埭河口
羊棧嶺北水出嶺北逕榷樹下北行牛泉山牛泉坑水自東來
入之又東北逕太平油竹坑宏潭會於石埭河口由涇南陵蕪
湖入大江高淳縣志丹陽湖有三源其一出徽州府黟縣者爲
舒泉按舒泉以經石埭姑泉下得名其入高淳湖亦以東壩
未築時言之
黟水清而不寒其味甘水深淺皆見底多石骨邑人多飲井水
味尤腴云水從土中過能養人船至魚亭簾至石山

駐劄大臣原始

太宗文皇帝滿洲國天聰九年得傳國璽於元小王子裔察哈爾林丹汗先是林丹汗屢犯邊睿親王征之林丹汗走死其蘇泰福晉以其子額哲籍家來歸封額哲親王游牧義州於是時外藩蒙古十六部四十九貝勒及士默特天聰三年來歸兩旗會於天眷盛京合辭上

尊號明年太歲丙子改元是為我

大清崇德元年崇德三年正月左翼士默特天聰六年來歸秦喀爾喀

札薩克圖汗犯歸化城二月丁酉

太宗親征出邊科爾沁天命四年來歸札賚特命天命元年奈曼天聰元年敖漢元末

魯特二年阿魯科爾沁六年四子部落七年茂明安八年巴林二年翁牛特

七烏珠穆秦八年十一部從征又郭爾羅斯都爾伯特以人命時

癸巳類稿 卷八

歸齊齊特克什克屯天聰八年來歸阿爾珠謀尼特鄂爾多斯天聰九年來歸未赴調不列又阿爾哈納爾於崇德時來歸皆

薩克壬子過興安嶺而明之邊臣懼喀爾喀侵軼以

大清兵報示之喀爾喀探之而信遂遷是年明崇禎十一年也

三月喀爾喀三汗使來六月設理藩院治各蒙古事七月丁卯

諭遣喀爾喀使漠北喀爾喀西域厄魯特皆元故臣也元裔察

哈爾既臣服而札魯特奈曼敖漢巴林又喀爾喀舊部故

太宗諭召喀爾喀喀爾喀亦元青吉斯汗後也是年厄魯特伊

札胡圖克圖下宰桑十七人來朝七年西藏黃教第五輩達賴

喇嘛班禪胡圖克圖和碩特顧實汗使人來朝約同行善事第

五輩達賴阿旺羅藏嘉睦燦顧實汗孫也先是唐古特四部

曰得濟曰喀木曰衛曰藏顧實汗逐唐古特汗自處青海喀木

而以藏衛處達賴班禪乃逐紅帽大寶法王花帽二寶法王黑

帽三寶法王是以顧實汗與達賴班禪三使同來時自藏衛青海東北行阻於喀爾喀顧實汗又與別部厄魯特不睦使者自言繞仇敵之國行經四萬里也始者蒙古番子尙紅教宗喀巴者爲觀世音化身學紅教於薩迦廟而忽歸黃教二弟子達賴班禪轉世行教持咒至驗當明中葉時已出紅教上番部尙服喇嘛下設第巴第巴下始爲汗王東西南北數萬里視爲天神喀爾喀以入藏隔於厄魯特則自別奉大喇嘛哲卜尊丹巴胡圖克圖而亦本於宗喀巴藏衛二喇嘛卜言東土有

聖人出當一統故遣使貢方物以振興黃教爲言八年賜達賴班禪書喀爾喀託雅奈等來歸時欲全收喀爾喀而

太宗賓天

世祖章皇帝御極受朝時喀爾喀使臣在列也是年天下定三

癸巳類稿

卷八

七

部喀爾喀無事順治二年撫顧實汗鄰部西寧暨河西各土司三年蘇尼特騰吉思與睿親王不合偕公主北走投喀爾喀我兵追之圖舍圖汗子及碩雷汗子以兵五萬迎騰吉思我師敗之初喀爾喀欲害公主騰吉思哭曰

太宗皇帝仁育萬國我奈何肯恩害公主耶喀爾喀乃止我師亦迎公主還五年喀爾喀來犯喀倫敗去六年二月睿親王征姜瓖欲並征喀爾喀行三日馬瘡道乏水止八月瓖誅十月徵敖漢札魯特察哈爾烏喇特土默特四子部落兵征喀爾喀至喀屯布拉特不見賊而還七年厄魯特渾台吉使來朝九年達

賴喇嘛朝

京師築北黃寺居之其行也
接見於

南苑德壽寺

賜金冊印遣王貝勒等護送之

賜厄魯特顧實汗金冊印十年圖舍圖汗車臣汗兩部喀爾喀

掠巴林部又來索歸順同部蒙古

命宣威大將軍安親王岳樂討之尋以喀爾喀入貢撤兵十三

年厄魯特糾邊夷入犯西寧劫奪牛馬拒官兵

詔大臣至西寧衛訊理按例賂償番子在明屬蒙古者歸厄魯

特聽納進其舊屬明者役於中國厄魯特不得爲寇災番子自

西寧北沿甘涼西至回地南自河州以南至四川各邊抵察木

多南迄雲南在唐爲吐蕃後分二三百部不相統忽弱忽強明

人謂之海寇明季厄魯特自甘涼北邊越中國地橫侵之遂役

於厄魯特厄魯特居青海者和碩特最强其他土爾扈特輝特

癸巳類稿卷八 大

喀爾喀寄牧十八家時時盜竊遂移臨鞏總兵於西寧衛以鎮

之十七年

詔禁歸化城喇嘛私往厄魯特喀爾喀十八年

賜喀爾喀丹津喇嘛敕印時喀爾喀七部跳梁漠北厄魯特四

部據西域綽羅斯特渾台吉最强盛伊犁雅爾額爾奇斯烏魯

木齊巴里坤縱橫五六千里皆所轄和碩特顧實汗旣據青海

又以兵入藏滅藏巴汗據有其地之圖伯特家勢俱張盛甚

世祖時天下初定

聖祖仁皇帝嗣位四輔臣未遑治也康熙三年喀爾喀貝勒古

木布伊爾登來歸四年台吉巴爾布冰圖來歸十年禁藏中唐

古特喇嘛無故來京十三年

賜喀爾喀札薩克阿海岱青喇嘛敕印時吳三桂反三桂與達

賴喇嘛通好達賴爲三桂請赦罪不許十四年察哈爾布爾尼反先是額哲卒弟阿布索襲阿布宗以罪禁錮立其子布爾尼至是吳三桂反調其兵南征布爾尼遂反

命撫遠大將軍信郡王鄂札及副將軍圖海討之布爾尼走至札魯特貴勒蘇台科爾沁部沙津赴調遇而射之殄乃分其眾爲八旗移宣化大同邊外西至歸化城東至克什克屯北至內札薩克各旗南自太僕寺牧廠中抵朔平邊是年青海諸番部與厄魯特戰有功十六年厄魯特綽羅斯特破青海和碩特初綽羅斯特渾台吉卒子僧格立僧格爲其兄車臣巴圖魯所殺立其子索諾木阿拉布坦僧格弟噶爾丹入藏爲喇嘛還伊犁殺索諾木阿拉布坦而遣使乞封於達賴喇嘛達賴喇嘛封爲準噶爾博碩克圖汗是爲準噶爾其家曰厄魯特其部曰衛拉

癸巳類稿

卷八

元

八十二

特古曰瓦拉其居曰伊犁其派曰綽羅斯特噶爾丹既立取青海和碩特車臣汗女而往青海殺車臣汗擄其人畜歸五月甲午使來告功進所獲弓刀

聖祖却之是時

聖祖方銳意討三藩亦未暇治噶爾丹噶爾丹經歷既多能忍多謀所屬人又最强悍耐苦戰其所破者回部之撒馬爾罕布哈爾哈薩克布魯特葉爾羌喀什噶爾察拉木土魯番哈密皆素號強富敢戰之國噶爾丹所向皆摧服屬之又約東都爾伯特輝特南向威令至衛藏喀喇喀者全據古北匈奴地元人所由起也西域原所制自厄魯特曰習戰鬥武藝遂強喀喇喀自阿魯泰時已不及之其地皆負俄羅斯爲近百年域外絕大之國東南接滇南則又皆我內札薩克以是局促益不及

厄魯特又內亂年饑人心離散圖舍圖汗又執札薩克圖汗殺之而奪其妾策凌三部亂

聖祖憫之二十五年春使大臣偕第五輩達賴喇嘛使爲之和解第五輩達賴已於二十一年死矣初達賴既立噶爾丹又通吳世璠雲南書噶爾丹以爲可挾而逞也及其死則使藏第巴桑結僞爲達賴猶在者言喇嘛入定不見人中國未之知也達賴使行噶爾丹使其弟多爾濟札布台吉隨覘之以圖舍圖汗待達賴使無加禮罵圖舍圖汗圖舍圖汗怒殺多爾濟札布台吉興師攻噶爾丹噶爾丹大憤謂喀爾喀大悖逆不敬佛乃敢輕蔑喇嘛使又殺其弟遂使喇嘛千餘人入游牧於喀爾喀二十六年九月圖舍圖汗以噶爾丹分兩路入占牧地出兵迎擊不勝卽亦安之噶爾丹遂揚言借俄羅斯兵且至矣喀爾喀探奏已類稿

卷八

二十

之無其事喀爾喀守備懈而噶爾丹言之不已二十七年

聖祖遣理藩院尙書阿爾尼備邊兼約達賴喇嘛使和解之噶

爾丹故與謀達賴喇嘛事者使至又偏護噶爾丹噶爾丹旣至

則壓喀爾喀而軍游牧喇嘛從中應之圖舍圖汗倉卒拒戰大

敗傾國東走時俄羅斯方與我爭雅克薩用兵四十年矣

聖祖意不欲與戰俄羅斯新汗亦請和旣有成約內大臣索額

圖等奉使經喀爾喀東部車臣汗地喀爾喀揚言

大兵來救已六月庚申使來乞援使臣不許阿爾尼亦入於軍

丁卯噶爾丹具書來使臣具機曉諭之得畢使事噶爾丹復踐

之喀爾喀部落散亡牲畜盡其地皆空噶爾丹據之圖舍圖汗

札薩克圖汗子厄爾克阿海巴朗車臣汗子烏墨特及哲卜尊

丹巴胡圖克圖前後糾餘眾投漠南叩關求撫

聖祖以此

太宗聖意也收而贍養之又以曲在喀爾喀

遣使慰囑爾丹使率眾西歸噶爾丹兼有西域回部青海漠北則益驕蹇不奉

詔二十九年侵託多厄爾德尼又揚言來侵崑都侖五月遂犯汎界至烏爾會河當是時

聖祖旣平三藩定隴蜀收臺灣和俄羅斯天下無事以噶爾丹勢熾旣入犯其志不在小且喀爾喀不可使無游牧也六月辛

丑集大臣於朝

下詔親征賊旣破喀倫復東趨越烏闌布通而南距京城僅七百里甲申遣人齋

敕諭之七月乙未撫遠大將軍裕親王福全師出古北口壬寅

癸巳類稿

卷八

三十一

駕至邊牆噶爾丹人來其書言喀爾喀我仇也因追之闌入

天朝汎界我在

大皇帝道法中不敢妄行因乞圖舍圖汗及哲卜等丹巴胡圖克圖乙巳安北大將軍恭親王常寧師出喜峰口康親王信郡

王奉

命屯歸化城噶爾丹書以六月二十七日丙戌發明日丁亥噶爾丹北去至烏闌布通撫遠軍及之噶爾丹大敗奔高山頂相

持久之始得去我師追之噶爾丹頂威靈佛立誓不復內犯捷奏至烏朱穆秦

御營八月己未朔

迴鑾丙寅

還宮丁丑

命簡出征各佐領下各十數人留備之餘俱撤歸十一月甲辰
噶爾丹使達賴喇嘛領厄魯特各台吉上

尊號

聖祖既達賴喇嘛數偏護噶爾丹長惡作慝無勸誠意其道
行不類噶爾丹又久據漠北不貴歸虛言頌揚無爲也却其表
貢物發還三十年四月丁卯

聖祖出塞五月

駐蹕獨石口外多倫諾爾喀爾喀三汗哲卜尊丹巴胡圖克圖
及各台吉朝見皆還其職以其七部爲三部東路曰車臣汗烏
巴什中路曰圖舍圖汗察理多爾濟西路曰札薩克圖汗策妄
札布爲三十七旗此本數也今游暫指游牧地使比內札薩克
四十九旗本五十九旗歸化城土默特兩旗復

癸巳類稿

卷八

三又川二

詔建稟宗寺以示興黃教癸卯

還京師二十一年以前征噶爾丹時烏鎗便利立火器營朝鮮
國王進烏鎗三千桿得

旨嘉獎永停朝鮮黃金及藍青紅木棉布貢三十二年達賴喇
嘛入貢

賜第巴桑結爵藏王罷西寧番族給蒙古納進例是年噶爾丹
兩遣人窺根敦岱青三十三年正月噶爾丹居庫克胡東之杭
幾爾察克窺根敦岱青無所獲遂侵喀爾喀又誘喀爾喀札薩
克叛歸舊游牧喀爾喀以

聞是年

賜西藏第巴金印

頒三十四年時憲法列蒙古各游牧節氣三十四年二月噶爾

丹奏索圖舍圖汗及哲卜尊丹巴胡圖克圖七月又奏言之八月犯汎界至克魯倫河搶掠那睦札爾託音

詔衫穆巴岱青墨爾根濟農謹備之噶爾丹使私約喀爾喀圖舍圖沙津爲內應夏

駕行圍木蘭沙津奏之得

旨誘之來於是噶爾丹進屯巴顏烏闌三十五年二月丙辰

聖祖親征出獨石口過噶爾圖至西巴勒台

遣人諭之且告以

皇帝出塞爾當來決戰若不戰而逃是無恥也噶爾丹亦僞言傾國東來且借俄羅斯兵六萬至

大軍遂進至枯庫車爾噶爾丹猶不信

親征也內行至克魯倫河登北孟納爾山望見布隆

癸巳類稿

卷八

三
XIII

御營黃幄布城網城大驚避去五月

駕至克魯倫河獲其輜重噶爾丹趨西路軍於土喇河於是北路平北大將軍馬思哈至巴顏烏闌搜討而西路撫遠大將軍

費揚古將軍孫思克康調元邀噶爾丹於特塔克濟敗之轉戰至昭莫多大敗之斬其妻阿努喀通殺帳下厄魯特二千餘人

又降其丁壯獲其牛羊一千餘萬噶爾丹旣懼於

聖祖威靈不敢敵其所喪亡又皆部中精銳則自盡殺其部中婦女老弱輕騎以逃道中遺漿渾脫及贖酪無算我軍盡收其

逃散部落捷奏至

聖祖自克勒和碩迴蹕

御筆銘察罕七羅拖諾山昭莫多各三十二字八月策妄阿拉布坦使來甲午

諭策妄阿拉布坦送噶爾丹策妄阿拉布坦者索諾木阿拉布坦弟也噶爾丹殺索諾木阿拉布坦僧格舊臣七人偕策妄阿拉布坦逃居土魯番畏噶爾丹故恭

朝命時噶爾丹居札薩克圖之博羅烏那罕空津札巴哈九月聖祖以噶爾丹窮蹙欲降之

親巡塞外十月至白塔進至鄂爾多斯旗噶爾使人來詔數其犯汎界之罪又示以待喀爾喀

恩例招撫之

諭之曰以七十日爲期噶爾丹若不親至者必進兵矣十一月自東斯垓班師

命理藩院豫立台站自獨石口至寧夏並察勘行塗宿次以待

方噶爾丹之遣使也授以書歎息曰天下人果不相同

癸巳類稿

卷八

一頁xL

中國仁聖太平皇帝神靈奇異我所屬之人皆往屬之矣爾至大皇帝所觀其侍從大臣行止若何歸日商之因泣下使者至漏言於我大臣

聖祖聞而憐之故益欲其降而噶爾丹卒不至是年哈密內附三十六年二月丁亥

親征駕出寧夏策妄阿拉布坦與哈密回子都拉達爾罕執送噶爾丹子色布騰巴爾珠爾而噶爾丹逃於薩克薩圖呼魯克之南格隔特哈朗古特

大兵循賀蘭山而西時方得達賴喇嘛詐僞事乃

降敕召噶爾丹我使至薩克薩圖呼魯克噶爾丹遣人受書去不報

聖祖親征時第巴桑結遣尼瑪塘胡圖克圖至具言達賴以戊

年故今十六年小達賴生十五歲矣達賴遺言小達賴有避忌不宜參拜故未具奏今案其期達賴以今年十月二十五日出定迎呼畢爾罕坐牀振興黃教是在

大皇帝求

大皇帝勿豫示人並封進賴臨終牀篋尸鹽拌像

聖祖以其事神異且十六年兵戈之劫情事悉合

許爲秘之使尼瑪塘胡圖克圖固封表文拌像而遣之歸約以十月後再入

覲而第巴又自遣使於策妄阿拉布坦我使臣於三月約策妄阿拉布坦兵擒噶爾丹策妄阿拉布坦兵已行路遇第巴使呼曰達賴死十六年矣小達賴今年坐牀爾等各安本土無妄起兵也策妄阿拉布坦聞之卽率眾遙拜哭歸土魯番使者還奏

癸巳類稿

卷八

三十一

聖祖以其事已昭布卽追尼瑪塘胡圖克圖還閏三月壬午

御行營傳齊大臣及各蒙古使尼瑪塘胡圖克圖開密封出表讀之及開拌像而頭已墮落在旁尼瑪塘胡圖克圖大驚仆於地眾蒙古皆合掌歎異曰

大皇帝十六年來疑喇嘛今知喇嘛已死十六年十六年事果非喇嘛所爲益信

大皇帝明並日月且至誠振興黃教喇嘛已死亦當感護法之意於是以其事

宣示各札薩克爲第五誣達賴喇嘛誦經致贈拌像者以第五輩達賴尸鹽證第六輩達賴化身古番王鑄像遺意也忽示凶兆藏中皆冠懼藏中初比噶爾丹秘達賴事又阻班禪胡圖克圖不與中國通至是噶爾丹失所恃薩克薩圖呼魯克獸已盡

部察離散妻子死亡以戀喀爾喀地舊部多爲策妄阿拉布坦
裹去策妄阿拉布坦復於阿爾泰伺之噶爾丹不敢西使人入
藏至青海又被獲不能達所至之處頻逢怪異烈風淫雨隨之
噶爾丹心迷惑壬辰於阿察阿木塔台仰藥死其將死也欲自
殺其幼子策凌撒魯布女忠濟哈旣念色布騰巴爾柱爾在中
國安樂

聖祖又屢詔召之必非欲置之死已以倔強故至此於是僅自
戕其族丹濟拉以其尸及子女來歸至阿爾泰策妄阿拉布坦
奪之丹濟拉自以其屬人來降四月庚戌朔

聖祖御筆銘狼居胥山三十二字甲寅

迴鑾使責策妄阿拉布坦使歸噶爾丹尸及其子女乃謂其尸
已焚三十七年八月始來歸其尸四十年九月來歸其女胡漠

癸巳類稿

卷八

三

X L X

平受賀立碑告成太學以漢北地

賜喀爾喀塔爾巴哈台山以東爲札薩克圖汗居杭愛山自鄂
爾渾河以東爲圖舍圖汗居土喇河自肯特山察罕齊老山以
東爲車臣汗居克魯倫河東至黑龍江庫倫諾爾南至各內札
薩克西至雅爾扎至俄羅斯界東西五千餘里南北三千里以

準噶爾舊游牧地

賜策妄阿拉布坦

授色布騰巴爾柱爾頭等侍衛後又嫁忠濟哈於侍衛沙克都
爾於是策妄阿拉布坦還和博克薩里收僧格舊人及噶爾丹
餘眾復成西方大部落當

聖祖出塞顧實汗子札什巴圖倫等八台吉有勞績

賜親王公衛顧實汗部曰和碩特爲四衛拉之一其子在藏爲

達賴汗傳達顏汗至拉藏汗在青海爲鄂齊爾圖車臣汗爲阿
拉善王噶爾丹以密親殺車臣汗而阿拉善王逃入中國
聖祖指與賀蘭山游牧地青海汗絕至是八家復振策妄阿拉
布坦旣立亦娶和碩特拉藏汗姊穎藏中殷富欲奪之則先許
奏藏王第巴桑結處事不公三十九年又奏書欲攻青海

詔青海勿輕動四十一年以青海番族日繁

命喇嘛商南多爾濟招撫清釐之卽留辦青海事四十二年札
什巴圖倫孫羅卜藏丹金襲親王四十四年拉藏汗殺藏王弟
巴桑結桑結旣首達賴事則傾心內附拉藏汗受策妄阿拉布
坦唆使故殺桑結中國亦以其先懷欺謾不之究也初第六輩
達賴喇嘛呼畢勒罕噶爾藏嘉睦榮出裏塘才二年青海各部
落請於西寧塔兒寺坐牀塔兒寺者西寧衛城西南四十里有
癸巳類稿 卷八

毛文上

塔山爲宗喀巴出世地胞衣埋焉後人就其地立寺黃教祖廟
也而藏中別訪呼畢勒罕博克達立之班禪欲入
覲又禁絕之

聖祖以桑結旣死恐策妄阿拉布坦據博克達爲亂四十五年
詔取之歸京師而送噶爾藏嘉睦榮入藏時和碩特輝特皆歸
順獨綽羅斯特有異議其使在藏跳梁不奉

詔五十二年

封班禪胡圖克圖爲班禪厄爾德尼

賜金冊印

鑒其欲來朝之誠也衛拉特分四部時曰綽羅斯特曰都爾伯
特曰土爾扈特曰和碩特土爾扈特與綽羅斯特不協率衆北
歸俄羅斯俄羅斯處之於額濟納河濱而都爾伯特分出一支

曰輝特仍爲四部策妄阿拉布坦取拉藏汗姊又娶土爾扈特阿玉奇汗女離間阿玉奇子散札布台吉攜眾萬五千戶至而沒入之阿玉奇嫂攜其子阿拉布珠兒入藏禮佛策妄阿拉布坦闕之不得歸又不使阿玉奇入藏熬茶阿玉奇使來貢方物聖祖厚賜之策妄阿拉布坦邀奪於路而絕土爾扈特貢道阿拉布珠爾歸路斷則自藏投中國

聖祖賜以游牧方思所以送之歸者而阿玉奇貢使假道俄羅斯至五月使職方郎中圖理琛由俄羅斯報之阿玉奇妹和碩特鄂齊爾圖車臣汗妻也車臣爲噶爾丹所殺攜其女歸依阿玉奇卽以妻阿玉奇子阿玉奇又故渾台吉外孫我使臣至阿玉奇全家念

聖祖所以待阿拉布珠爾色布騰巴爾桂爾忠濟哈及阿拉善
癸巳類稿 卷八 三十八

王者無不感泣爭置酒請使臣請

大皇帝安阿玉奇妹語尤切圖理琛之歸也阿玉奇曰我遣貢必經俄羅斯數則厭慮阻遏我我屬俄羅斯持教衣冠俱不同我終歸中國矣垂涕而別阿玉奇欲來歸道不通阿拉布珠爾亦遂游牧甘州邊外策妄阿拉布坦左右兼并馳突奔逸不可制將窺藏

聖祖賜之敕不得騷擾唐古忒而策妄阿拉布坦於五十四年反來侵哈密青海及土默特還犯巴里坤哈密游擊潘至善等擊之敗去我前使圖理琛移書俄羅斯西畢爾斯科噶噶林馬諦飛費達拉魚持收其逃亡策妄阿拉布坦聞之亦不敢復東拉藏汗旣殺第巴桑結則日昏憤以策妄阿拉布坦姊夫也子丹衷又娶策妄阿拉布坦女密親可恃一聽策妄阿拉布坦唆

使策妄阿拉布坦於五十五年十月遣台吉大策楞敦多布領
綽羅斯特六千人徒步繞戈壁晝伏夜行五十六年七月至藏
至則殺拉藏汗盡并其衆入布達拉廟搜喇嘛重器送伊犁留
大策楞敦多布守藏以拉藏汗印與第巴達則遂據達賴喇嘛
博克達以自重又自將攻青海和碩特拉藏汗二子其一丹衷
在伊犁依婦居其一索爾札游牧青海策妄阿拉布坦據之歸
既至伊犁有告丹衷詛咒者策妄阿拉布坦怒殺丹衷而以其
妻博特洛克妻唐古特之輝特韋徵和碩齊以歸道哈密爲我
師所敗也興師來犯於是振武將軍傅爾丹駐兵阿爾泰靖逆
將軍富寧安駐兵巴里坤是年城哈密五十七年置靖逆衛赤
金衛柳溝所我師經理衛藏出打箭爐裏塘而是年我將軍額
倫特都純色倫額提督康泰進兵至哈喇烏蘇糧餉爲賊所截
癸巳類稿

卷八

元 8 11

軍士皆沒五十八年協理將軍祁里德偕富寧安兵至闕展傳
爾丹兵至格爾額爾格策妄阿拉布坦方策應我西北路兵而
五十九年我師已南入藏平逆將軍貝勒延信兵出青海大策
楞敦多布來逆敗之定西將軍噶爾弼出打箭爐達瓦里章巴
者青海人也於裏塘謀逆副將岳鍾琪於五十八年誅之拉里
黑喇嘛自稱河州喇嘛迎師而陰遣番子截奪軍糧將軍覺亦
誅之先是三十九年桑結遣昌側集烈等據明正土司四川提
督唐希順誅之四十七年準噶爾擾藏工布土司死守不下至
是降於岳鍾琪察木多亦納款大策楞敦多布逃回伊犁是年
增西寧火器兵二千五十四年置赤金靖逆二衛五十九年傅
爾丹進兵蹂烏蘭呼爾吉屯牧賊兵北顧撫遠大將軍固山貝
子允禩鎮青海延信等帥江寧杭州荊州滿洲兵四川雲南山

東緣營兵於八月由察木多送達賴喇嘛噶爾藏嘉睦榮入藏
九月庚午達賴喇嘛噶爾藏嘉睦榮坐牀我師誅厄魯特各喇
嘛取厄魯特所立達賴喇嘛博克達及桑結妻子歸於是康衛
藏阿里東西六千五百里南北五千里俱定六十年九月丁巳
立碑於達賴所居之布達拉昭地

聖祖御製文七六十年我師進駐烏魯木齊策妄阿拉布坦
既失達賴則自於伊犁河濱立固爾札廟以奉喇嘛以五十六
年所劫布達拉供器實之尋使人至雍正元年正月丙午

世宗憲皇帝命大臣傳諭其使臣以我

聖祖之恩不可再邀策妄阿拉布坦當自戢尋

命撤阿爾泰巴里坤兩路大兵定準噶爾使臣在第三班朝鮮
使後上朝而策妄阿拉布坦無回奏是年置安西衛及沙州所

癸巳類稿

卷八

三

八

青海喇嘛及親王羅卜藏丹金丹津渾台吉等糾蒙古番子犯
邊

命撫遠大將軍年羹堯討之毀西寧衛郭隆寺大通衛郭莽寺
師出青海十月降貝勒貝子公台吉二十餘人撫其眾數十萬
編喇嘛所屬奔拉番子爲佐領二年二月戊午奮威將軍岳鍾
琪領兵復出青海王申大捷獲羅卜藏丹金母及輜重歸三月
庚辰奏凱四月壬戌

行受俘禮誅惡頭目助逆者六月乙酉立碑太學

世宗御製文也十月岳鍾琪復出師獲丹津渾台吉及其妻子
羅卜藏丹金逃青海故隸四川雲南邊外於是分其地

賜各蒙古又移山北厄魯特居之置大通衛兵而增西寧西二
千里哈吉爾西北二千一百里塞爾騰馬步兵五千人城布隆

吉爾置安西衛青海與準噶爾故世姻也亦世仇羅卜藏丹金卒歸策妄阿拉布坦策妄阿拉布坦死子噶爾丹策楞立能用其父人亦卒匿羅卜藏丹金而與和碩特修好給索爾札及丹衷子班珠爾戶策妄阿拉布坦又一女曰達什色布騰亦嫁和碩特羅卜藏策楞噶爾丹策楞謂羅卜藏策楞欲歸土爾扈特則執之亦以達什色布騰與章徵和碩齊久之藏中熬茶使通噶爾丹策楞不忘藏地也適羅卜藏丹金謀殺噶爾丹策楞爲所覺卽執之欲送中國而奏書言其父已成佛矣已欲振興黃教使天下眾生安樂

世宗怒責以非伊分位所當言而噶爾丹策楞方與藏中阿勒布巴隆布奈札爾奈等謀奪康熙五十九年中國所立拉藏舊臣貝子康濟奈權驩擾藏地台吉頗羅奈以聞三年

癸巳類稿

卷八

三

44

命寧遠大將軍岳鍾琪征之時雲南兵由中甸察木多入藏是年改西寧衛爲西寧府築西寧西北大通白塔永安三城皆屬西寧府設青海辦事大臣署分青海蒙古二十九旗設大通總兵又升沙州爲衛而以靖逆之柳溝所隸安西四年岳鍾琪移甘肅貧民屯田沙州改柳溝所爲衛青海番子地升科以河州歸德所隸臨洮五年建安西鎮于大灣城都爾伯勒津移安西衛治之收西寧各寺明國師禪師敕印是年藏中殺康濟奈改中甸維西屬雲南六年噶爾丹策楞來犯噶斯我師擊敗之獲其將棚楚克六月青海台吉諾爾布反於屯格里我師擒之吏部尙書查郎阿至藏奏

命誅阿勒布巴等十一月打箭爐西裏塘建惠遠廟移達賴喇嘛居之時噶爾丹策楞勢熾懼其篡取之也十二月封頗羅奈

爲貝子使總理藏事七年四月壬寅以征噶爾丹策楞告

太廟免甘肅錢糧募增甘肅各營馬步戰兵守兵以傅爾丹爲

靖邊大將軍巴賽及查弼納爲副將軍會岳鍾琪出師是年收

巴塘裏塘屬四川八年正月遷達賴喇嘛於噶達適噶爾丹策

楞有送羅卜藏丹金信至五月兩大將軍皆入朝請

訓以提督紀成斌護寧遠大將軍巴賽護靖邊大將軍噶爾丹

策楞窺之十二月使小策楞敦多布及臬將馮木特以二萬人

劫西路牧廠於科舍圖總兵樊廷副將治大雄拒之賊獲利去

九年四月傅爾丹進屯科布多築城居之六月噶爾丹策楞來

犯傅爾丹拒之軍敗於和通涼爾副將軍巴賽查弼納皆戰歿

當是時西路寧遠營巴里坤馬廠被劫北路靖邊營科布多又

失事西路聞之則使提督紀成斌進攻烏魯木齊以分賊勢賊

癸巳類稿

卷八

三

七三上

亦兩路設兵大策楞敦多布駐華鄂爾奇斯小策楞敦多布駐

喀喇鄂爾奇斯我北路軍營改屯察罕渡爾噶爾丹策楞乃率

二策楞乘勝鳴角東趨犯喀爾喀額駙喀爾喀郡王策楞勒兵

敗之噶爾丹策楞遜去晉額駙策楞和碩親王援大札薩克時

圖舍圖汗十七旗滋息至三十八旗分二十旗與策楞爲賽音

諾顏札薩克親王部今二十二旗以鄂爾渾河以東至喀魯

特哈河爲游牧以翁金河爲王庭其喀魯特哈河以東屬圖舍

圖汗自是喀爾喀爲四部十一月傅爾丹改振武將軍以振武

將軍順承親王錫保爲靖邊大將軍進屯科布多又以康親王

爲撫遠大將軍是年城巴里坤十年塞卜屯策楞納木札爾自

烏魯木齊擾哈密岳鍾琪遣曹勳紀成斌敗之七月以張廣泗

護寧遠大將軍賊又犯科布多噶爾丹策楞潛越阿爾泰察罕

洩爾杭愛山搶奪哲卜尊丹巴胡圖克圖副將軍丹津多爾濟拒之值額駙策楞入

觀噶爾丹策楞突至據其地額駙聞之斷髮誓復仇疾馳歸力戰敗之噶爾丹策楞棄輜重走追之自辰至午卽又大敗之斬其梟將喀喇巴圖魯又率喀爾喀二萬於喀喇森齊淖爾蹴之又敗之於鄂爾渾河厄爾德尼昭賊三萬人幾盡敗卒由歸化城下綏遠將軍馬爾賽擁兵不出賊始一脫去乃斬馬爾賽凡兩創噶爾丹策楞額駙超勇親王策楞功最多十一年設安西道分青海南巴喀地居西寧四川西藏中者玉書納克書等番子三十九族四千八百八十九戶隸駐藏大臣建西寧廣惠寧佑二寺復郭莽郭隆舊制以安黃教署寧遠大將軍查郎阿副將軍張廣泗駐西路七月以定邊大將軍平郡王福彭代錫

癸巳類稿

卷八

三

各川三

保駐北路烏里雅蘇台尋移科布多十二年春我師越厄爾齊斯探擊賊賊移帳去噶爾丹策楞下令部中通察所掠人數時我師守巴里坤賊不能南侵又懲厄爾德尼昭之敗也不敢深入以是欲罷兵七月庚子

世宗召王大臣問應罷兵與否莊親王允祿等言應剿之大學士張廷玉等言且撫之若不順則進剿兩議上

高宗純皇帝時爲寶親王言應罷兵

世宗憲皇帝卽降旨罷兵八月量撤北路兵畫哲爾格西拉呼魯蘇爲界準噶爾兵事稍息是年春布魯克巴巴勒布入貢布魯克巴在天竺北藏西南巴勒布亦藏西南邊外國分三汗曰布彥汗曰葉楞汗曰庫枯陸汗與布魯克巴同遣使入

觀十三年撥兵駐防鄂爾渾於厄爾德尼昭迤北築城戍之而

遣使送達賴喇嘛入藏設河州鎮改大通爲協乾隆三年移臨洮歸德所屬西寧噶爾丹策楞遣人來請以阿爾泰山爲界喀爾喀游牧亦不得過札布堪

高宗純皇帝許之撤兩路大兵準噶爾得入藏熬茶如故而噶爾丹策楞復於固爾札廟南增立海努克廟自奉喇嘛凡衛拉供喇嘛者九集賽萬六百戶喇嘛六千餘人是年章嘉胡圖克圖爲達賴喇嘛請巴塘裏塘地時維西土司喇嘛廟巴塘裏塘最宏麗以達賴所降生也故章嘉爲請之

詔以巴塘裏塘商稅賜喇嘛地仍內屬四年進封頗羅奈郡王十年噶爾丹策楞死子策妄多爾濟納木札爾立而幼其姊鄂蘭巴雅爾執其政策妄多爾濟納木札爾聞其姊欲自立爲叩肯汗叩肯汗者俄羅斯女汗號也則繫其姊而亦無威儀智略

癸巳類稿

卷八

言

811

至以夜出偷狗爲樂其先世雄桀之風盡矣鄂蘭巴雅爾之夫曰撒音伯勒克輔噶爾丹策楞幼子喇嘛達爾札攻執之篡其位而達爾札昏暴益甚其宰桑撒拉爾率千戶來歸

高宗納之十五年藏王頗羅奈之子朱爾墨特既襲藏王欲以藏地應準噶爾則奏請撤回駐藏大臣時駐藏大臣傅清布拉敦以朱爾墨特逆謀不可止不如先誅之其黨必反已去其首惡卽反亦易平卽誅朱爾墨特其黨果反四川總督策楞提督尙書公岳鍾琪討平之遂除藏王凡衛藏事皆駐藏大臣與達賴班禪定議付噶布倫四人行之十七年準噶爾阿睦爾撒納殺達爾札而立渾台吉幼子布木之曾孫大策楞敦多布之孫曰達瓦齊達爾札兄弟行也阿睦爾撒納者輝特台吉章徵和碩齊娶博特洛克時所生實丹衷遺腹子亦和碩特貴種也和

碩特兩汗亡拉藏汗孫在伊犁者阿睦爾撒納班珠爾及索爾
札子納哈查皆爲台吉阿睦爾撒納幼育於輝特得輝特家親
表兄弟中與噶爾丹策楞幼子策妄達什善見綽羅斯特內亂
與班珠爾謀立策妄達什達爾札知其謀則殺策妄達什以絕
其謀阿睦爾撒納班珠爾逐挾達五齊三人者同逃之哈薩克
已而三人復歸舊游牧阿睦爾撒納襲殺韋微和碩齊子沙克
都爾而并其眾遂通伊犁喇嘛帥各宰桑殺達爾札而立達瓦
齊初丹衷以兩釜夾身烙死最慘阿睦爾撒納生徧身血出其
母祝曰吉利吉利無爲冤仇也及阿睦爾撒納得志其外祖策
妄阿拉布坦基壞汗位外傳而大策楞敦多布親殺拉藏汗者
二人反不仇達五齊達五齊旣立阿睦爾撒納歸舊游牧收有渾
台吉弟墨爾根岱青六世孫納墨庫吉拉噶拉者突領兵萬餘

癸巳類稿 卷八

臺 三 上

至伊犁與達五齊分地達五齊戰不勝走厄爾舊游牧適阿
睦爾撒納來會誘納默庫吉拉噶拉至雅爾殺之達五齊復歸
伊犁四衛拉之分界也綽羅斯特治伊犁和碩特治青海都爾
伯特治額爾齊斯土爾扈特治雅爾土爾扈特北去輝特治之
綽羅斯特自渾台吉始爲四部盟長非有君臣之分也自噶爾
丹策楞死益無遠略阿睦爾撒納據輝特欲借綽羅斯特以收
和碩特都爾伯特爲四部總台吉伊犁所奉之固爾札廟海努
克廟喇嘛道行卑惡畏阿睦爾撒納如虎坐食無爭則又生讒
慝搆之於達五齊於是綽羅斯特輝特遂有隙和碩特本以連
姻伊犁亡而阿睦爾撒納娶都爾伯特達什女德勒克多爾濟
又以妹庫克妻達什子納默庫而襲殺達什收納默庫爲台吉
自遷帳於額爾齊斯當是時阿睦爾撒納令行兩部和碩特又

親屬偏向之初阿睦爾撒納欲繼渾台吉霸業故經理綽羅斯既與達瓦齊不合則與和碩特班珠爾納哈查都爾伯特納默庫會哈薩克踐達瓦齊舊厄彌勒地達瓦齊三遣人攻之皆不克十九年達瓦齊自領精兵三萬又使梟將馮木特將烏梁哈兵八千攻額爾齊斯阿睦爾撒納倉卒戰不勝七月與其兄輝特札睦斡率宰桑二十餘來歸十一月至

高宗納之使處札布堪五月都爾伯特策楞策楞伍巴什已先至和碩特班珠爾亦來馮木特亦以達瓦齊不可輔脫身來歸綽羅斯特紛紛來降

高宗均納之使處於喀爾喀以非久計也欲以二十年秋進兵取伊犁阿睦爾撒納以為塞外用兵例以秋乘馬力也我馬肥彼馬亦肥不如以春彼馬未肥不能遠遁一戰擒之無後患

癸巳類稿

卷八

美

八

高宗是之二十年二月丙辰丁巳兩路師啟行五月乙亥北路師至伊犁伊犁素無雷雨是日霹靂一聲雨下如注丁亥大捷六月庚戌擒達瓦齊準噶爾平是役也定北將軍班第定邊左副將軍阿睦爾撒納爵親王出北路定西將軍永常定邊右副將軍撒拉爾出西路北路師至綽羅斯特噶爾藏多爾濟先降百萬控絃之士皆望風降達瓦齊方縱樂飲酒不知也師逼伊犁達瓦齊走格登山遣二人出調兵為我師所獲既知達瓦齊所在丁亥夜綠營兵二十二人歸誠厄魯特三人斫其營營皆驚大軍乘之則皆降達瓦齊走天山南至烏什阿奇木伯克霍吉斯執送之並獲羅卜藏丹金送

京師六月十月兩

行受俘禮赦其死罪而贍養之而阿睦爾撒納論功

晉封雙親王時

高宗分封四汗治衛拉欲其如喀爾喀之長久安治也重兵皆撤獨留兵五百隨班第駐伊犁河北尼楚裘經理善後事宜阿睦爾撒納知四汗已封心狂惑必欲得四部總台吉額駙科爾沁親王色布騰巴爾珠爾白軍中還

朝託之入奏期以七月下旬信可到而額駙不敢奏阿睦爾撒納乃倡言哈薩克布魯特皆畏已故不敢動藉緩朝期其與厄魯特言諱其降也曰我帶滿洲漢人及喀爾喀各蒙古來平伊犁在伊犁不服

賜衣翎頂不用定邊左副將軍印取渾台吉菊形篆印行文宰桑及鄰部渾台吉印形圓其行最遠西域皆信其能借

天朝兵歸定難也阿睦爾撒納又寄信藏中熬茶言已總四部

癸巳類稿

卷八

三

時善待達賴喇嘛振興黃教兼四部之意已決第欲恩出自上則無後患故未反既不得額駙信則使固爾札喇嘛見將軍中國若不使阿睦爾撒納主伊犁者喇嘛等當自刎死將軍笑而頷之其事漸積上聞

高宗以阿睦爾撒納反跡已定馳

諭班第於其未發先誅之彼若入朝是借此逃也可追及則追誅之信未到阿睦爾撒納已定計離伊犁八月偕喀爾喀親王額楞青多爾濟入

朝九月至烏隆古遣人取其妻孥不得則以副將軍印交額楞青多爾濟而北竄忽反顧西行四部亂從逆者蓋起哈薩克沙津等方入貢亦應之台站斷班第馮木特及參贊大臣鄂容安等死之撒拉爾等閒道出迎師永常自木壘南退巴里坤軍糧

移屯哈密阿睦爾撒納至伊犁上書猶稱定邊左副將軍雙龍王言大臣等乖張狂傲踞高坐見喇嘛口稱

大皇帝命我管轄汝等奴數勸之不聽奴慮伊犁必變奴行伊犁果變奴聞亂馳歸鎮撫求

皇上封奴阿睦爾撒納四部總台吉

高宗以其書及班第所上書隨前後

敕諭班第及烏里雅蘇台收其妻孥密旨

頒示中外革額駙色布騰巴爾珠爾親王爵

賜額楞青多爾濟白盡

命策楞爲定西將軍代永常以玉保爲參贊進討賊我師已數敗之二十一年正月玉保以大軍至特克埒距阿睦爾撒納僅一程阿睦爾撒納使人僞爲台吉伯什阿噶什諾爾布使言阿

癸巳類稿

卷八

三

睦爾撒納已就擒卽檻送至玉保與策楞卽發紅旗入報且駐軍待之阿睦爾撒納得整裝去二月我師進復伊犁阿睦爾撒納入左哈薩克左哈薩克納之同拒我師值將軍參贊不和緩師五月逮策楞玉保

命定邊右副將軍達爾黨阿爲定西將軍追阿睦爾撒納破之定邊左副將軍哈達哈至伊什爾伊什爾者左哈薩克庭也左哈薩克遠徙去數千里右副將軍之參贊富德師至右部茶格勒特伊右哈薩克亦降達爾黨阿又被給與左哈薩克使命往還頓兵月餘而阿睦爾撒納復歸博羅塔拉伊犁復震領隊將軍和起陣亡策楞玉保亦被戕於塗定邊右副將軍兆惠自伊犁整旅出至濟爾哈朗遇賊力戰而東屯巴里坤時喀爾喀和託輝武郡王青衮札卜以北路台站繁費且以額楞沁多爾濟

之死也曰喀爾喀青吉思汗後高向不泊罪阿睦爾撒納心欲
爲惡額楞青多爾濟何由知之軍興大人往來者多將日日有
死罪也衆喀爾喀皆以爲然六月自十六台至二十九台一時
皆撤綽羅斯特聞之則皆反故伊犁益亂

高宗以超勇親王子親王成袞札卜爲定邊將軍及參贊納木
札爾擒治青袞札卜台站復兆惠自十一月至二十二年正月
無日不戰二十二年二月圍解兆惠兵進伊犁

詔逮達爾黨阿哈達哈時四衛拉慮痘死者已過半其新封綽
羅斯特汗噶爾藏多爾濟叛其姪札魯噶爾布又從而篡之部
內自殘殺幾盡和碩特汗沙克都爾曼津依巴里坤以居參贊
大臣雅爾哈善得

旨察其動靜輒殺之屠其部衆班珠爾亦以叛誅輝特汗巴雅
突已類稿 卷八 三

爾反殺和起又戰敗而走索倫海蘭察追至其游牧塔爾巴哈
台射而擒之三汗皆亡其部下屠戮未盡者逃入山爲喀喇沁
以食人爲生方二十年之出師也撒拉爾言阿睦爾撒納不可
專任

高宗以爲阿睦爾撒納欲平伊犁與吳三桂滅明唐王心事同
要在有以制其死命而已撒拉爾又言噶爾藏多爾濟不可爲
汗至是其言驗而厄魯特殺劫亦盡矣蒙古番子奉黃教而喜
劫掠兼佛與夜叉二義用之故其盛也喇嘛食肉殺人取皮骨
作供器及其計無復之爲喀喇沁食人其在西藏供養怪異刑
慘法酷喇嘛猶依違佛教伊犁喇嘛則益無恥又無忌憚厄魯
特以死奉之我大臣坐見喇嘛卽附阿睦爾撒納噉厄魯特反
又值青袞札卜之變謂可不通

聲教遂使厄魯特等支體屠折身首異處部落逃散千里蕭條
我師再趨伊犁時遠望火光燭天則固爾札廟遭天災火勢猛
甚喇嘛皆焦人心始知所向伊犁復平

高宗命於熱河仿固爾札式爲安遠廟又尙西藏摩耶寺爲普
寧寺爲置高行喇嘛以安四衛拉特歸順之家阿睦爾撒拉方
聞軍營失律四部搆亂自博羅塔拉來觀釁至則台吉達瓦又
殺札魯噶爾卜迎阿睦爾撒納六月突遇兆惠兵跳而走兆惠
富德窮追之沿左哈薩克左哈薩克降進表貢馬追至俄羅斯
額爾圖拉喀倫七月阿睦爾撒納攜八人逃入俄羅斯俄羅斯
納之時成袞札卜改定邊左副將軍泊喀爾喀事兆惠以定邊
將軍辦賊俄羅斯喀昇潭瑪玉拉堅稱阿睦爾撒納六月渡額
爾濟納河溺死其國置月法各異而達瓦齊舊人自俄羅斯逃歸者言

癸巳類稿

卷八

罕

661

七月於俄羅斯親見阿睦爾撒納兆惠以聞

高宗命理藩院移文俄羅斯薩那忒衙門使送阿睦爾撒納適
阿睦爾撒納於俄羅斯發痘死二十三年二月俄羅斯西畢爾
斯科噶噶林昇爾哈迪爾昇出其尸於恰克圖喀爾喀親王桑
齋多爾濟入奏

命侍郎三泰喀爾喀親王齊巴克雅蘭丕爾馳往驗實以聞自
噶爾丹犯喀倫以來中國運糧屯甲於科布多左右及嘉峪關
外設軍營時接仗誅殺者七十餘年至是厄魯特底定邊
將軍兆惠定邊右副將軍富德追沙喇過東布魯特東布魯特
五部皆降初準噶爾強盛時回部爲之役天山南各居國財富
地大準噶爾留共長於伊犁歲徵其財至哈薩克等行國納馬
而已康熙二十一年噶爾丹以嫌繫山南阿布都爾實特三十

五年噶爾丹敗阿布都爾實特脫出來歸

聖祖優賜之遣人護至哈密使歸葉爾羌然以準噶爾勢大年納貢賦噶爾丹策楞以事疑回部則幽繫和卓木墨特死於伊犁又繫其子大和卓木布拉郭小和卓木霍集占乾隆二十年我師至伊犁於阿巴噶斯岳託釋大和卓木歸葉爾羌釋小和卓木禮之於伊犁使辦回部事阿睦爾撒納反小和卓木和之我師復至逃歸兆惠使副都統阿敏道往視之將招撫之回及厄魯特木異類也初相爲仇回人恨厄魯特抄掠及多求年例私欲食其肉中國至盡除其苛條回人安樂無事卽又相與議論曰我初屬於厄魯特何可背也烏什霍吉斯不得爲義士矣且我回人何可爲人屬中國使來不可納也小和卓木議論定則挾大和卓木殺回子之異已者擇精兵守庫車拘阿敏道突已類稿

卷八

聖
80X

而又害之事聞

高宗震怒二十三年

命靖逆將軍雅爾哈善參贊大臣哈寧阿討之互有勝負久之兩和卓木走入葉爾羌我軍入庫車空城也於是斬雅爾哈善以納木札爾爲靖逆將軍三泰爲參贊又調兆惠自天山北路移師而南先是

高宗以兆惠久於外使之搜殺厄魯特反者三部逸賊畢卽回師休息而兆惠以回部未平願助靖逆軍攻剿以藏西師之局書奏

高宗壯其志因而用之兆惠至阿克蘇已前降則撫庫車阿克蘇定烏什和闐十月已未進至葉爾羌我師三千人攻之數與戰皆勝丙寅兆惠偵知回部牲牧在城南大河之南思奪取之

由城東橋度度半橋忽斷賊盡出城中精銳及我軍血戰一晝
夜總兵高天喜副都統三寶等死之兆惠左右衝擊馬斃又易
者屢矣河南散卒漸復合力疲不能復戰穿塹喀喇烏蘇南以
死守賊築長圍困我先是兆惠遣愛隆阿以兵八百人迎靖逆
將軍納木札爾納木札爾既見愛隆阿知兆惠軍急疾趨而前
夜遇賊亦死之二十四年正月戊子富德自北路移師來援至
呼爾璦未及將軍三百里又被圍辛卯提督豆斌力戰死之兩
軍皆重困萬里外適二十三年六月

命阿里袞等檢索倫察哈爾健銳營及陝西甘肅官兵帶馬匹
糗糧赴軍營接應定邊靖逆兩軍聞定邊軍困

詔促之速行於二十四年正月癸巳至馬蹄跚蹟所過塵埃全
起漲天回人來偵者不辨多少也皆駭而返我兵與愛隆阿齊

奏已類稿

卷八

聖 811

驅之夜至一處望見燈火方十餘里如螢繞忽離忽合知是呼
爾璦也相率鼓噪而前呼聲震山林前薄之回軍亂富德聞之
方夜炊率眾犯圍出富德阿里袞轉戰赴將軍營丙申將軍整
陣迎之內外夾擊我軍新舊合士皆喜而奮也丁酉盡劔其圍
賊被重創入城自守我軍亦以久勞苦退保阿克蘇

高宗既厚集兵力付兆惠兆惠既休息脩理軍裝閏六月兩路
出師兆惠收喀什噶爾富德攻葉爾羌兩和卓木聞喀什噶爾
失則大懼棄葉爾羌走富德邀擊於賀斯庫魯克敗之再敗之
於阿拉楚拉及哈拉庫拉追至洱西洱庫拉淖拉從亡者萬餘
人皆降兩和卓木挈妻孥及舊僕三百人走入拔達克善拔達
克善亦同部也我師索之拔達克善汗素爾坦沙聚其阿渾議
論曰布拉敦霍集占罕帕爾子孫也回教經典不得執罕帕爾

子孫與人議論未定而兩和卓水欲邀鄰部亂其國爲所覺則擊殺之送其尸中途大和卓木首爲其從者劫去拔達克善以和卓木尸偕愛烏罕博羅爾二國來降回部平並收西布魯特塔失干瑪爾哈朗霍罕納睦于諸國安集延之浩罕四城貢表九月庚午捷奏至

京師是役天山南北東連喀爾喀北至俄羅斯哈薩克西至哈薩克布魯特南連藏東南連青海闊地二萬餘里

高宗神武竟

兩朝未竟之志凡戰處皆立碑

天章照耀絕域矣凡大典禮皆案故事舉行二十五年二月壬寅

聖駕郊勞將軍兆惠等於良鄉城南三里在事有功諸臣圖像

癸巳類稿

卷八

聖
XLI

紫光閣達瓦齊霍吉斯皆封王入旗籍先是二十年

命都御史何國宗等攜儀器徧測各部天地經緯度二十二年頒時憲書刊各蒙古節氣日出入早晚至是

遣明安圖增測立回部時節日出入表是年立哈密廳以安西

沙州柳溝靖逆赤金五衛地置安西府以柳溝衛安西衛爲淵泉縣靖逆衛赤金衛爲玉門縣沙州衛爲燉煌縣後藏烏特噶

里畢爾奇碩拉汗入貢二十六年改大通衛爲縣二十九年伊犁設寶伊局回部亦於葉爾羌開鑄乾隆通寶錢三十六年土

爾扈特烏巴錫聞綽羅斯特和碩特輝特皆亡可以竊據伊犁遊牧也卽棄俄羅斯率衆南來六月至喀倫知伊犁規模已定

不敢逞乃籍衆歸順曰俄羅斯不興黃教願依

大皇帝興黃教之地以安部衆遂入覲於熱河是年

高宗建普提宗乘之廟於執河祝

皇太后釐廟成而烏巴錫至烏巴錫者康熙時入貢阿玉奇曾孫也於是四衛拉之人全四衛拉惟達什達瓦妻以屬下人來歸無後編其人爲兵居於熱河其外游牧者都爾伯特汗策楞親王策楞烏巴什在舊游牧額爾奇斯東古木及土爾扈特卓里克圖汗烏巴錫其三部無汗綽羅斯特則康熙二十五年來歸一部在烏蘭烏蘇和碩特輝特先時來歸各部王台吉貝勒貝子公等雍正二年俱處之青海土爾扈特游牧汗依雅爾親王在喀拉沙爾與古木都爾伯特皆

高宗所指也三十八年以烏魯木齊置迪化州以巴里坤置鎮西府改安西府爲安西州裁安西道四十六年七月第六董班禪厄爾德尼來朝祝

癸巳類稿

卷八

四

x 1

高宗七旬萬壽康熙時班禪欲來不得達至是來如達賴故事蒙古番子皆歡喜奔走承事

詔仿札什倫布式建須彌福壽之廟於執河班禪厄爾德尼至

接見於

避暑山莊澹泊敬誠殿班禪跪請

聖安從至京

接見於

南苑德壽寺

世祖接見達賴處也又

接見於

靜宜園昭廟使居西黃寺十一月班禪卒明年二月送之歸凡賞賚賻贖及經由草地番子蒙古翰納其徒擁之歸者總數十

萬金而珠冠袈裟金玉磁茶器用奇珍異采不可勝計班禪親兄仲巴胡圖克圖習黃教爲班禪洽商上事遂有其財弟舍瑪爾巴習紅教不得分班禪財班禪所居之札什倫布在拉薩西南五百六十里爲藏西則阿里地其言拉薩者衛也古之烏斯卽唐古特俗謂之前藏者也在打箭爐西北三千四百八十里達賴居拉薩之布達拉中國言菩提宗乘也其東則察木多爲康爲帕克巴拉呼圖克圖所居康衛藏阿里在唐爲北中西三印度地印度後退保厄納特阿克其地屬吐蕃今爲圖伯特班禪達賴轉世遞相爲師圖伯特衆所仰望班禪所居札什倫布以外地卽屬達賴凡藏阿里之戴琿第巴皆達賴補放仲巴胡圖克圖外視之私擁班禪遺賫不以分資衆皆怒舍瑪爾巴遂唆廓爾喀以兵擾藏廓爾喀在藏西南喀倫外先已侵蝕巴勒

癸巳類稿

卷八

五

八

布三汗地而與藏之聶拉木濟瀧江攷宗喀接五十三年廓爾喀旣入舍瑪爾巴言又以藏中噶布倫丹津班珠爾等增加廓爾喀商稅子鹽則和以土積忿不能平遂侵蝕藏邊聶拉木諸地藏中驚擾成都將軍鄂輝馳往治之
乾清門侍衛巴忠以解唐古特語奉
命往經理其事至則丹津班珠爾等與廓爾喀議和退回聶拉木以聶拉木外札木隙地予廓爾喀又歲予廓爾喀元寶三百立會同分執之巴忠則與聞也乃爲廓爾喀部長拉特那巴圖魯與其叔巴圖魯薩音具認罪表求

天朝罷兵將軍以其輸地具奏請

旨

高宗詔罷兵其私立會同中外皆不知也五十四年廓爾喀入

頁五十五年使臣入都祝

八旬萬壽封拉特那巴圖魯廓爾喀國王巴圖魯薩音亦加公爵而五十六年廓爾喀大至陷邊

高宗方狩於熱河疑之旣而大臣奏理藩院侍郎巴忠落水死乃

命窮治其事始知元許元寶仲巴胡圖克圖惜費五十五年不肯予故廓爾喀以是年至

高宗以巴忠輸幣讓地不顧大體邊境大事又欺謾不奏當極典而其身已死乃徙其家於邊是時廓爾喀巴裏丹津班珠爾去直趨札什倫布仲巴胡圖克圖棄其貲走前藏札什倫布有喇嘛四五千人尙可守也濟仲喇嘛札蒼喇嘛卜於吉祥天母傳神意言不可戰衆潰廓爾喀數百人入廟肆掠不敢東亦不

癸巳類稿

卷八

吳

八

肯遂歸退并大衆伺於邊上而藏中自驚擾駐藏大臣欲援惠遠廟故事移達賴喇嘛於泰寧

高宗怒治駐藏大臣罪革廓爾喀國王爵

命大學士福康安參贊大臣海蘭察惠齡帥師討之五十七年五月師至以倡言失守逮濟仲喇嘛劄黃正法而解送仲巴胡

圖克圖及札蒼喇嘛於

京師鄂輝及領隊大臣成德進師收復聶拉木宗喀諸地大軍追剿至濟瀧海蘭察成德進至熱索橋橋斷海蘭察潛師上游札筏浮渡奪其險遂入廓爾喀界凡前後七戰七克之大軍齊至帕朗古又克之直逼廓爾喀所居陽布廓爾喀窮賊送出所掠

金冊及

賞件言知是

天朝物不敢燬也舍瑪爾巴已死於陽布卽送出骨殖退回札木地繳元寶會同具永不致滋事結請

命奏至八月

詔許其歸順赦其罪復封爵五十八年設寶藏局以贍之設鄂博於江孜定日更定制度噶布倫轄於駐藏大臣如內地例喇嘛自明宗喀巴以來所謂汗喇嘛在古則天帝釋也至是與我大臣平行在事有功諸臣圖像

紫光閣凡四圖像西師廟爾喀及金川臺灣也藏西北二十程至和闐爲天山路衛東北四千二百里至西寧又一路三千六百七十里至西寧西寧青海大臣所建牙也自阿里以北以東圖伯特四分青海二十九旗厄魯特汗王各旗喀爾喀八十

癸巳類稿

卷八

聖
又三七一

二旗游牧五十九旗番子數百部各土司皆喇嘛教獨回部居國行國佛教不能行中國興黃教以撫諸藩諸藩悉爲內地而喇嘛亦諸藩矣宗喀巴經言達賴班禪六七輩後卽不復轉世時班禪第七輩達賴第八輩宗喀巴若先知其事者

高宗神聖百族稟命慮藩部心無所繫也

詔令達賴班禪兩呼畢勒汗當永生西土以興黃教安藩部鎮金奔巴瓶

賜布達拉兩呼畢勒罕互報差異者納名瓶中於宗喀巴前掣之吹忠降神納賄敢爭之弊盡革除喀爾喀及內札薩克胡圖克圖之呼畢勒罕出報名理藩院掣之瓶供

雍和宮兩喇嘛與內札薩克外札薩克諸喇嘛各統其家服屬中國凡乾隆年間兩定準噶爾一定回部兩定廓爾喀皆事涉

駐劄大臣者又兩定金川一定臺灣及安南緬甸初叛後歸順
總爲

十全武功文在

皇帝嘉慶元年恭上

太上皇帝寶冊嘉慶五年二月

皇帝敬念新疆開闢始自乾隆年間

詔新疆乾隆通寶錢每年鼓鑄二成永以爲例七年六月

詔以春秋致祭伊犁山河祭文億萬年遵用乾隆二十六年所

頒者朕字敬改書

高宗純皇帝九年伊犁建社稷壇是年入輩達賴卒十一年十

二月新攝達賴羅卜藏的達以謀殺莊戶得

旨劉黃交駐藏大臣穆克登額等嚴訊而呼畢勒罕實以十年

癸巳類稿

卷八

吳

十二月出甸麻春科土司家是爲九輩凡游牧內札薩克科爾

沁等四一九部及小部厄魯特及舊依中國土爾扈特四旗朝

期分三班治事分六會

欽派大臣臨視之其駐劄大臣移徙不定今以嘉慶十一年列

之治土默特者綏遠城將軍一人歸化城副都統一人治察哈

爾音察哈爾游牧都統一人副都統一人治喀爾喀音烏里雅

蘇台將軍一人初爲定邊左副將軍參贊大臣一人科布多參贊大臣一人

人屬烏里雅蘇台兼治都爾庫倫辦事大臣二人治喀爾喀兼

羅斯邊事初止一人治西域者伊犁將軍一人總統天山南北路初

光緒八年後因張格爾惠遠城領隊大臣四人惠寧城領隊大臣

一人烏營木齊都統一人木都爾領隊副都統一人庫爾喀拉

烏蘇領隊大臣一人八巴里坤領隊副都統一人古城領隊副都

統一人塔爾巴哈台參贊大臣一人即雅爾本士爾扈特輝特
特汗游牧乾隆三十一年移城楚呼楚地領隊大臣二人喀什噶爾參贊大臣一人
山南同部參贊伊宰初治葉爾羌後移此乾隆三十年烏什亂
移烏什五十年復移此道光十一年改參贊於葉爾羌其喀
什噶爾幫辦大臣改協辦大臣一人葉爾羌辦事大臣一人協
理大臣一人和闐辦事大臣一人幫辦大臣一人烏什辦事大
臣一人阿克蘇辦事大臣一人英吉沙爾領隊大臣一人庫車
辦事大臣一人喀拉沙爾辦事大臣一人兼理土爾扈特土魯番
領隊大臣一人哈密辦事大臣一人幫辦大臣一人治青海者
西寧辦事大臣一人治圖伯特者西藏辦事大臣一人幫辦大
臣一人嘉慶十二年正月

癸巳類稿

卷八

晃

川文

臺灣府屬渡口考

福建之海門戶爲閩安爲海壇泉州府北崇山環抱南接金門廈門西南至廣東之香山其南則大洋金門廈門之東南洋爲澎湖三十六島澎湖西爲娘媽宮東過洋爲臺灣臺灣在福建辰巽方東北自雞籠山西南至沙馬碇凡千九十四里與福州興化泉州漳州四府相直自澎湖往水程四更自廈門往十一更其山脈發福州之鼓山自閩安越白畎洋關漳山至雞籠山自雞籠山蔥翠層疊而南山南北峙泛海者以雞籠爲準則也山中番族百四十有奇人無姓依婦以居山田植薯芋甘蔗山有識颱風一節則一年一颱風無節則其年無颱風大具風也其人文身黑齒言語不通中國其居日固如覆船番有生熟熟番屬中國號中國曰唐閩粵與東南洋語皆自稱曰唐習也熟癸巳類稿

卷九

一
L
L

番畏生番每出捕鹿收芋蔗啁晰而歌大意言願出行不遇生番然遇生番則盡力殺之無辜法解詛咒婦人皆知之咒樹木立死山之西平壤或十里或五十里今府地也淡水廳東北有噶瑪蘭彰化縣東有埔里社西面地肥沃南濱七鯤身最險迤北過安平鎮南汕爲鹿耳門又北爲北汕青鯤身南鯤身鹿仔港迤而東北至淡水港北淡水港對閩安中鹿仔港對蚶江南鹿耳門對澎湖臺灣門戶也後鹿耳門淤改由海豐港卽五條港小水口則雞籠山西至淡水城五中隔諸番社又西南至嘉義水口三十又南至臺灣縣八又東南至鳳山二又東南至沙馬碇五中八里坌對五虎門亦門戶也又山後烏石港加禮港港皆東面海與山前三大港皆設稅其他小者或不通舟澎湖西有紅溝黑溝臺灣北爲萬水朝東船入之直趨東洋南爲南

風氣直趨南皆大溜海水各有界各有所注色不淆其落際最險水勢旋轉潮水不能入潮高水下潮下水乃高船入之旋轉不已幸不沒伺潮消長與際平時破急溜而出也沙馬碕西對海爲小琉球山當澎湖之南隋大業中虎賁將陳稜一至澎湖東向望洋而返宋謂之毘舍那國見馬端臨通考毘舍那則生熟番也元置巡司於澎湖明初內徙其民棄澎湖地宣德時闢使入洋東至臺始知之謂之臺員見周嬰東番記亦謂之北港天啟二年高文律擾澎湖總兵俞咨臯用間移之于北港見顧祖禹讀史方輿紀要泉州澎湖島嘉靖四十二年俞大猷逐海寇林道乾道乾逃入雞籠山旋又遁去琉球人居之萬曆時海寇顏思齊逃入臺文報始稱臺灣思齊引倭屯之而琉球東去萬曆末荷蘭紅毛人自西洋來欲據香山不可則據澎湖又不

癸巳類稿

卷九

二

八十三

可乃南據美洛居及葛留巴以鷓片煙誘葛留巴葛留巴人俱腫腫不敢動役於荷蘭旣而荷蘭聚集精銳攻香山戰敗揚帆東走至澎湖使人行重賄於福建巡撫援意大里亞人居香山故事以求澎湖必得巡撫使人善諭之則投日本歲納鹿皮三萬求臺灣互市地適日本人居臺灣者新奉天主教遂許之築赤嵌城以居今安平鎮是也荷蘭旣得地卽數數與日本構爭日本旣染其教爭不勝盡屬東去憤甚盡誅其人之習天主教者並約束琉球而荷蘭據有臺灣置歸一王亦不復東天啓初乃西擾澎湖及廈門四年福建巡撫遂取澎湖其東臺灣旣自古聲教不及不悉其址故籌海圖編無其名明尚以爲外荒也鄭芝龍者閩人也爲日本塚家於臺灣日本之東歸也芝龍以舟楫人衆橫於海崇禎元年降明明南渡封南安伯領水師鄭

氏之令北自京口南至漳唐王隆武南徙鄭氏遇之於浙輔而立之其所據泉州興化漳州汀州邵武惠州潮州

大清順治三年芝龍自安平奉表降以之北行其子成功本名

王時賜逃入海據泉州之金門廈門八年舟山平魯王朱以海

航海走至金門成功奉之十一年沈魯王十八年入京口窺江

寧敗而無所歸也徜徉海中者數月乃決計盡力攻臺灣荷蘭

人方守鹿耳門鹿耳門水大漲成功舟浮而上荷蘭大驚徵辭

於成功成功曰吾無他求此我家舊地還我子女玉帛汝悉載

以去荷蘭人思之終日不敢戰退保平安鎮成功環山列營塞

山水源困之既又焚其舟師遂去而伺於噶留巴臺灣人猶有

習其教者曰教册成功則盡除之鄭氏既有臺灣名之曰東都

值耿氏開藩福建海禁弛乃招徠客民漳泉惠潮習水者趨地

突已類稿

卷九

三
九十一

利泛海寄居地遂富庶聲勢遙連金門廈門康熙元年成功死其妻董氏與眾立其子錦二年荷蘭自噶留巴遣出海王以師助中國取金門廈門既而耿逆反錦尾耿逆後取漳泉諸郡改東都曰東寧承天府運米內渡相持三四年臺地空乏及耿精忠降諸郡以次收復錦走據金門廈門以為臺援十八年二月荷蘭以夾板船來助攻錦偵知之分兵破其眾荷蘭遁去錦旋死二十二年施琅克金門廈門取澎湖進兵至鹿耳門不得入泊海中十二日潮不至舟師得安忽大霧潮長鹿耳門水大漲舟師浮而入錦子克塽曰昔先人得臺灣鹿耳門漲以為天助今復然舟師浮而入

皇帝天威不可抗也遂降收其地以承天府置臺灣府北為淡水廳南天興州置諸羅縣承天置臺灣縣萬年州置鳳山縣西

爲澎湖廳立文廟鼓鑄用臺字鄉試用至字編卷三十年以臺

灣人文盛罷試卷別編例後仍用至字號道光八年臺地粵籍

於慮鄉試開中康熙五十五年南北兩路生番納貢雍正二年

另編田字號卷分諸羅北爲彰化爲縣四乾隆五十二年改諸羅爲嘉義五

三年生番入朝移鳳山縣治於牌頭以舊城爲興隆里嘉慶十

二年復鳳山舊城十六年於淡水廳東北三貂嶺外蛤蚧闌五

圍設噶瑪蘭通判編客民四萬二千九百餘丁及番族立樹城

東北至崑崙嶺爲界臺灣俗以寄籍分黨沿積習械鬥故易嘯

聚中更朱佑龍劉却朱一貴吳福生林耀楊光勳林爽文莊大

田蔡牽之亂皆削平朱一貴以康熙六十年四月僭號永和六

月鹿耳門水漲施世驃藍廷珍自南澳濟師討平之林爽文莊

大田以乾隆五十一年十一月僭號順天以卯月爲正圍諸羅

癸巳類稿

卷九 四

柴大紀拒之黃仕簡由廈門進鹿耳門任承恩由蚶江進鹿仔

港徐鼎士由閩安進淡水港五十二年常青恆瑞由五虎門進

鹿耳門藍元枚進鹿仔港諸羅圍不解而南路鳳山旋復旋失

冬海蘭察自廈門福康安自崇武港俱至鹿仔港賊女軍師金

娘方臨陣誦咒持妖術助戰而降番莊錫舍執以來歸遂擒爽

文又南獲大田賊平

頒右旋白螺於閩督署督撫將軍提督過海則佩之五十二年

十一月二十一日

旨也後仍繳進嘉慶十年冬十一月二十三日海盜蔡牽自稱

鎮海王擾鳳山浙江提督李長庚自寧波抵鹿耳門十一年正

月賊逸去二月以大利益吉祥右旋螺交賽沖阿帶往渡洋六

月賽沖阿督各路師追之賊復返置大舟於鹿耳門而去蔡牽

在海中欲從海東入烏石港取噶瑪蘭地地在淡水廳山後去淡水城五百里乾隆時已漸墾四月設兵備之十二年朱潢又謀由海東蘇澳入竊五圍南地禦却之漸籌設屯十六年九月乃定設噶瑪蘭廳於是臺灣兼山東山西地初鄭克塽降眾議守澎湖內徙臺地人民而棄其地施琅曰是資荷蘭也力持不可及平朱一貴眾議以副將守臺灣而置總兵於澎湖則臺灣有所制藍廷珍爭之乃定今制臺灣兵一萬四千餘皆內地標兵抽撥泛海更戍初以臺地沙土浮鬆不時地動且海外初置郡縣故以樹為城承平久人心固定始築土石城而淡水廳為竹塹噶瑪蘭廳在五圍地九芎樹城也嘉慶十七年冬至日

澳門紀略跋

嘉慶壬戌春始讀澳門紀略愛其奇偉甲子冬張徵君炯以重刊本見貽昔嘗伏讀

聖祖仁皇帝康熙五十五年十月辛亥

聖訓云朕訪聞海外有呂宋噶囉巴兩處地方噶囉巴乃紅毛泊船之所呂宋乃西洋泊船之所彼處藏匿盜賊甚多壬子聖訓云海外如西洋等國千百年後中國恐受其累此朕逆料之言伏惟思患預防

聖人善教海外臺灣荷蘭日本互爭卒入郡縣版圖澳門則佛郎機意大里亞荷蘭先後窺伺而意大里亞於明萬曆九年入居於澳二十九年荷蘭薄澳崇禎十年又薄廣州荷蘭恃巨礮大船意大里亞仿其礮製破之今澳中十月夷人禳鬼逐紅毛

癸巳類稿

卷九

六

與西藏逐牛魔王同蓋以爭所居地深怨而實畏之皆掌故也海盜之起必有窩綫呂宋實佛郎機噶囉巴實荷蘭又安南廣南向亦畜盜自底滅亡此數國者遠隔重洋辛苦遠戍其用意甚深既錄得官書四裔考又讀高拱乾及余文儀臺灣府志陳倫炯海國聞見錄及此澳門紀略而深惡意大里亞及荷蘭荷蘭既并淳泥噶囉巴又與佛朗機分瓜哇美洛居又與意大里亞分地滿其垂涎臺灣靖海紀已昌言之其屢窺澳門有迹而又畏意大里亞過其前佛朗機躡其後已見於乾隆八年及十年之師前同知印君光任張君汝霖所以籌畫之者甚詳惟其事散見非深思者不能得其條理也荷蘭夾板船此書言有商船戈船二種其製尤備高拱乾臺灣府志述廣南札船破夾板船式嘗錄出之與四裔考廣南傳合此書及明史言佛朗機取

呂宋以牛皮惑之高志言荷蘭取臺灣亦然荷蘭之據臺也初
養盜後敗於盜凡海上警非盜使外夷卽外夷使盜此可伴爲
不知不可竟不知也荷蘭之屬爲淳泥爲噶囉巴爲瓜哇爲英
吉利爲瑞爲璉佛朗機之據澳也奉釋教後改奉天主教不十
年澳門遂爲意大里亞所有此二事最可寶貴意大里亞久假
澳門順治時乃遂置兩王於此

今天子明聖撫外夷有道不過以澳門爲天文生客館耳且事
久難驟更以西洋之互爲窺伺知此書必不可廢微君爲同知
張君令子論世之大體因書其大要而歸之嘗與徵君言澳門
南有十字門二重其真爲天主教窟穴乎抑澳門終如臺灣爲
民居設重鎮西洋人船行避十字乎久之必有定也嘉慶丙寅

冬十一月

癸巳類稿

卷九

七
川上川

左山考

山東通志山川志云曹縣左山在縣東二十里卽左城也又名左岡左邱明父墓在焉曹州府志山川志云左山在曹縣西北六十里相傳爲左邱明父墓曹州志此曹州未升府與地志云左山在州南五十里山南有舊州治古蹟志云晉太史左公墓在左山邱明父墓也案驗左山方位通志誤矣今荷澤宋爲乘氏曹縣宋爲濟陰俱屬興仁府府爲五代曹州舊治卽濟陰則今曹縣城西北左山之西南古城是也唐傳異記云濟陰郡東北六里左山有龍興古寺可以相證濟陰城隋置在左山右太平寰宇記濟陰云左岡在縣東北五里以其近左城也今通志於曹治亦云山在東不悟城隍東徙執簿尋求迷軌躅矣先是北魏置西兗州治定陶水經濟水過定陶縣南又東北荷水東突已類稿

卷九

八

左山考

出又東逕魏冉冢南又東北逕定陶共王陵南注云世謂之左城亦名之曰葦城則左城由在魏定陶之左今左山東北舊城也左城之名由魏定陶城定之左城有定陶恭王陵左山則有慎到墓宋陳師道披雲樓記云古陶西南有山圖記謂之南右山州人所謂南魯太師慎到之墓又云慎到墓今名左山太平寰宇記則左岡與南山各列云南山在縣西南四里誤以古陶西南入濟陰西南虛增一山也金大定末濟陰治東北徙七十里明洪武元年又西北徙七十里二年定今治左山遂在治西後人不得名左之義遂以左墓當之府志陵墓志之言謂左山左公墓有宋盛琳撰碑通志亦同琳碑旣絕不見而明天順五年大明一統志兗州府屬時曹陵墓下則云魯太史墓在定陶縣陶邱之上葬魯太史左邱明之王父有宋盛琳碑是琳並

不言邱明父也追尋舊文言左墓者亦並不言邱明祖萬曆三十八年曹縣知縣錢達道登山記云考之邑乘春秋左太史瘞骨此山故以山屬之左左山者緣左史而得名也又萬曆舉人郭文英左公廟碑記云州治之南四十餘里靈聖湖迤南有士隆然一邱號爲左山不知始於何代州誌則謂邱明之墓蓋周良史云是萬曆以前州誌邑乘又以爲邱明墓其廟創始萬曆亦止以祀邱明今通志府志秩祠左公祠下並云宋崇寧元年呂希哲希能有寶乘塔題名不悟明人造廟而引宋人他處題名納入之殆不可通也寶乘塔者隋仁壽二年於濟陰法源寺建塔五級藏定光佛舍利六顆宋慶曆時復詔修之賜名寶乘皇祐五年知濟陰縣錢明逸作左山興化寺寶乘塔碑銘詳敘其事其說左山止云曹州左山時治山右名義易知絕無及

癸巳類稿

卷九

九

九

左公者陳師道披雲樓記云左山下多左姓故名其時左姓人亦無言邱明者明人嘗徙治後疑於左山名義州志縣志改太師爲太史遂侈然以左山爲左邱明墓一統志以濟南肥城屬濟旣載邱明墓則以曹州左山屬之邱明王父今通志府志見其互異則又斟酌遠近屬之邱明之父使邱明三世寄名慎到墓下其作僞之迹不可掩也

左邱明墓考

肥城東平嶧曹皆言有先賢左邱明墓方志多歧何以核其實也肥城本漢地里志泰山郡縣東漢省入盧其東平國富城蓋分其地北魏則肥城地俱入富城孝昌三年始復置肥城唐省之牛入陰平牛入乾封元史地里志東平路平陰云至元十二年以縣之辛鎮寨孝德等四鄉分析他屬明年改寨爲肥城肥城有元抹罕遺愛碑云至元十二年割平陰之沙溝等五鎮孝德四鄉復置肥城縣時案圖記平陰縣東南三舍有古肥城得之牛山南因址建城元史地里志濟寧路肥城云至元十二年以平陰辛鎮寨東北十五里古城改設今縣是也水經汶水注云沁水西南流逕肥城縣故城南沁卽今城南肥水今縣城卽漢城元人葢據水經知之水經注又云沁水自肥城故城又西

卷九

十

南過富城則魏富城治在今治西南魏富城本漢肥城地魏書地形志東平郡富城注云有富平城下城武強城左邱明冢魏富城爲今肥城邱明冢見古籍者以魏書爲始冢在肥城佳證一矣通志建置志云魏孝昌三年置肥城古蹟志云後周置肥城建置古蹟並云唐省入乾封此則疎也富城地唐時東北入乾封西南入平陰水經濟水注引京相璠云平陰齊地在濟北盧縣故城西南十里南去防門三里太平寰宇記長清縣云盧城在縣南五十里今長清治遷於宋治東北十里則京相璠所言盧城當在今長清治南六十里水經釋地云盧城在今長清南十五里是不知徙治又倒讀寰宇記平陰縣志云盧故城在縣東北七十里長清境內其迤西南十里正今肥城西北境內爲唐平陰治唐元和郡縣志平陰縣云左邱明墓在縣東南五

十五里應在今縣西南地佳證二矣通志建置志云唐省入乾封宋省入平陰此又疎也宋乾封改奉符不得云省其肥城之南地在平陰則仍唐舊太平寰宇記云鄆州平陰縣本漢肥城謂其治爲肥城地又云隋開皇時置榆山縣大業二年移於今里改名平陰則宋平陰治始隋大業時一與唐同又云左邱明墓在縣東南五十五里亦與元和志合佳證三矣明天順一統志二十二濟南府陵墓云左邱明墓在肥城西南二十五里蓋五十五誤刊字檢肥城志云縣西南五十五里肥河鄉都君莊有左邱明墓都君莊者通志云舜居此成都處鄒平成君啟洸至衡魚得元正覺寺碑讀之文作都君蓋古屯練處今莊名衡魚肥水亦曰衡水也邱明墓依古籍在今肥城審矣東平州志則疑左墓在其境內不悟魏東平地大非今州地也太平寰宇

癸巳類稿

卷九

十一

八〇〇〇

記沂州承縣云左邱明墓在縣東北七十里與鄆州平陰墓並列宋承縣東北地當在今嶧縣元子欽齊乘云左邱明墓在嶧州東北七十里又云平陰復言有左邱明墓意右嶧墓而宋以前無徵明一統志二十三兗州府陵墓云左邱明王父墓在定陶縣陶山曹州志明萬曆時錢達道登左山記引邑乘云春秋左太史瘞骨此山郭文英左公廟記引州誌云左山邱明墓山東通志曹州府志舊曹州志皆云左山爲左邱明父墓案左山爲慎到墓其旁左城爲定陶恭王墓左山在濟陰城左故名左明移曹治而山在治右後人不得左山名義改慎墓以當之志乘之蹤迹如此烏可據以亂肥城邱墓也

俄羅斯佐領考

八旗通志旗分志云鑲黃旗滿洲第四參領之第十七佐領係康熙二十二年以尼布綽地方取來鄂羅斯三十一人及順治五年來歸之伍朗格里康熙七年之宜番等編爲半個佐領卽以伍朗格里管理後二次又取來鄂羅斯七十人遂編爲整佐領伍朗格里故以其子羅多理管理羅多理故以大學士馬齊管理今以豐伸濟倫管理謹案此卽今承恩侯尙書恭阿拉所管理之佐領也八旗通志初集亦言順治五年俄羅斯伍爾各里來歸康熙七年倭番等來歸此皆自拔來投者

平定羅剎方略云康熙二十二年四月羅剎殺斐雅喀居民留嫚書而去七月甲申瑪拉等送所獲羅剎五人又送二十六人至京四裔考亦云二十二年羅剎之來有過黑龍江者降其兵

癸巳類稿

卷九

三

XXXX

目三十餘人此卽通志所言之三十一人方略又言南岱攜至羅剎二人則四裔考遺之

聖祖仁皇帝聖訓柔遠人云二十二年九月乙未戶部議奏羅

剎歸順吉里郭里等應交與正白旗編入佐領下壯丁少者

二曰羅剎歸順頗多應令編爲一佐領鑲黃旗之佐領蓋自

欽定也薩布素傳云康熙二十二年投誠羅剎宜番鄂噶圖席

圖頡吉里戈里鄂佛那喜等酌給官職案方略十一月癸未

上諭云宜番近授驍騎尉岳噶圖席圖頡及新投誠之吉里戈

里岳佛那西馬克西木俱授七品官其新投誠內之岳佛那西

費禮普令馳驛至薩布素處酌遣招撫四裔考云遣降番宜番

米海羅莫海對往諭誤也宜番未嘗與米海羅等同往招撫方

略云二十三年正月羅布素令宜番等往諭卽以招撫米海羅

等二十一人送京安插是米海羅等投順卽送京也方略又云是年七月獲羅刹一人曰費岳多羅送京安插熱河志二十三年十二月十六日

上諭於恒滾等處之俄羅斯許其歸順待以不死而生養之是也二十四年三月獲羅刹噶瓦力刺等七人逸去一人五月破雅克薩城巴什里等四十人願降此則通志所言後二次之七十八人也七月羅刹又遣裔番等四人誘我俄羅春被獲旋縱之歸羅刹名裔番者眾非卽康熙七年來歸之宜番也熱河志二十四年六月十四日

上諭雅克薩困迫已甚而後歸降宥其罪釋之使還是也四裔考云二十四年七月釋衣番等四人歸國語無原委覽者惑焉其噶瓦力刺等六人亦於進兵時放之還南岱攜至之二人亦突已類稿

卷九

三川上

已縱歸方略載噶瓦力刺供詞所謂前放回之二人已送往國主處是也計所獲順治五年一人康熙七年宜番等二十二年三十三人二十三年二十四年七十二人而遣歸者十二人總得羅刹近百人居東直門內胡家圈衙衙其姓氏源流則八旗氏族通譜皆不載也嘉慶十一年三月

俄羅斯事輯

俄羅斯在黑龍江四部喀爾喀雅爾左右哈薩克圖理雅斯科
北西至荷蘭英吉利海又南抵務魯木居國也其先起於右哈
薩部西鄙其人曰羅刹亦曰藥殺當南北朝魏太和時羅刹始
立國曰俄羅斯其人用天主教欲殺佛佛遇惡物奇怪輒以羅
刹名之羅刹地小聲名文物皆不著傳七百餘年部人漫衍至
西海由恒羅斯城以北至計由居焉蒙古太宗時諸王莽賽叩
擊奇卜察克進兵攻俄羅斯降之元末諸王外鎮者勢離析羅
刹內亂俄羅斯部長伊番瓦什里玉持乞援於其國西北之西
費雅斯科而割國西之那爾瓦城賂之而自立為汗其國震強
明嘉靖時南滅庫程汗阿斯坦拉汗遷其人於阿爾泰山北遂
南與韃靼瓦刺鄰東曰西畢爾斯科接今黑龍江喀爾喀西曰
癸巳類稿 卷九

齒 666

喀山斯科接雅爾哈薩克圖理雅斯科自伊番瓦什里玉持汗
二十二傳至額勒克舍靡汗羅費持都莫斯克窪斯科是為察
罕汗最强盛有大斯科七日莫斯克窪斯科日計由斯科日思
瑪廉斯科曰佛羅尼使斯科曰郭羅多阿爾哈連斯科曰西畢
爾斯科曰喀山斯科者若中國省治府城一斯科所屬小
斯科數十柏興數百柏興若縣治也其地東西北三面臨海廣
三萬餘里山川城郭人物畜牧種植五方風氣部類別處羅衛
與中國同其書橫行自左而右東合拉提諾西合托忒烏珠克
而轉譯蒙古清漢文崇禎時雅爾額什爾努拉之土爾扈特和
鄂拉勒克汗惡綽羅斯特越哈薩克投俄羅斯察罕汗指喀山
額濟勒河之南圖理雅斯科之東哈薩克之北馬努託哈無城
郭地與之使為藩部時

太宗文皇帝大兵方定黑龍江索倫達瑚拉及使馬使鹿兩部
俄羅春東北際海爲自古疆域所不及而俄羅斯亦東南略地
奪雅克薩尼布楚地樹木城居之兩師相值各罷兵旣又南向
侵擾布拉特烏梁海奪四佐領崇德四年

大兵再定黑龍江毀其木城歸而未議置戍也俄羅斯旣富庶
互市例人至其國市者則衛藏以西沙章汗愛烏汗其外市則
西至安集延伊犁哈密喀爾喀東至黑龍江秋高馬肥被罽捆
貨而至面白微頰高準采鬚緋紅氈帽油鞞帳居者布列黑龍
江西岸地其植麥種自西域來爲麩潔白性宜人人物甚都雅
而數與我爭邊境

世祖章皇帝順治十一年於黑龍江征之十五年調高麗兵征
之又數遣大臣督兵皆以餉不至半途返順治十二年十七年
癸巳類稿

卷九

五

X L I L X

俄羅斯兩附貿易商人至京城者奏書於

世祖而絕不及邊界事康熙初又屢用兵十五年貿易商人尼
果賴等至

聖祖仁皇帝召見之

賜察罕汗書論邊界事而察罕汗久之未荅也二十一年定策
屯田大出師征之收其人及火器編其人爲佐領隸

京師鑲黃旗滿洲二十三年薩布素刈取雅克撒尼布楚田禾
以船載歸二十四年五月甲申我師拔雅克薩縱城中羅利歸
去而二十五年正月俄羅斯復來城之我師往爭俄羅斯人以
死守不肯去是年荷蘭使至聞其事曰俄羅斯西臨西洋我鄰
國也

聖祖命作書付荷蘭轉達之而額勒克舍靡汗羅費持亦於是

年卒額勒克舍靡汗羅費特無子有一女曰票多額勒克舍雅費特素臬雄爲女子時習戰鬥宮中以兵爲戲經略布武無有敵者嗣父察罕汗位是爲察罕散丕特里普爾汗亦曰叩肯汗其國言男曰叩女曰叩肯也叩肯汗旣卽位究尼果賴事案地

圖曰

中國皇帝仁聖且限以行國我西北西費雅斯科西南圖理雅斯科雖小部近肘腋所當爭也九月乃遺書中國議和二十六年七月使至喀爾喀圖舍圖汗境文書往返二十八年十二月丙子定邊界以額爾古訥河爲界歸我雅克薩尼布楚定市於哲卜尊丹巴胡圖克圖之庫倫而磨崖刻會議七條滿漢拉提諾蒙古俄羅斯五體字爲黑龍江之吉爾巴齊河東岸其漢字則行書也秋議定則遣使索那爾瓦城於西費雅斯科不與以癸巳類稿

卷九

六

七

兵征之盡并其地數千里以已名名之曰散丕特里普爾斯科而遷都之於是其國大斯科凡八七道置噶噶林守之都城置大臣四總八道之治又索阿藻城於圖理雅斯科控噶爾汗控噶爾汗不與則盡奪其阿藻東北地前後用兵二十餘年國中戰甲不少解嘗徵土爾扈特攻西費雅斯科謂土爾扈特無用用以壯觀而已綽羅斯特汗噶爾丹之擾喀爾喀也揚言假俄羅斯兵六萬又火器手六萬至喀爾喀大驚二十九年五月癸

丑

聖祖諭其商人馳告疆吏無助亂其時俄羅斯方西向用兵故無南侵意也三十三年其使自土魯番哈密來入嘉峪關互市時爲立館於京城中玉河橋西定三年一互市來者不得過二百人以八十日爲期三十五年噶爾丹爲我師所困求救於俄

羅斯俄羅斯不肯應噶爾丹遂亡五十年土爾扈特使由俄羅斯至五十一年五月

聖祖使圖理琛等往報之道出俄羅斯經西畢爾喀山兩斯科往返行三年以五十四年三月歸繪圖呈

御覽又為異域錄數萬言記兩斯科東西所經又言其國北界

夏至無夜其汗二十七年元日乙丑當康熙五十一年十二月

十六日二十八年元日辛未當康熙五十二年十一月二十七

日我康熙五十二年閏五月俄羅斯則每歲十二分二十九

三十三十一日歲在三百六十六日上下也我使過竟時察罕

汗命邊臣厚禮之又遣兵護我使歸既而汗卒亦立其女自是

其國皆傳女雍正五年八月復與我議喀爾喀以北自楚庫河

以西沿布爾穀特山至博穆沙畢嶺為界而定市於恰克圖

癸巳類稿

卷九

七

八川上三

時俄羅斯方攻西藏西南五千里之務魯木以其地尙佛請於

世宗憲皇帝遣人至中國學喇嘛以通蒙古使命兼學蒙古接

骨大夫年滿替換送為例六年遣子弟入國子監讀書於滿漢

助教各派一人教之居於舊會同館其衣服飲食由理藩院給

發乾隆十九年土爾扈特使由俄羅斯入貢二十一年九月至

熱河二十二年我師定西域凡俄羅斯人逃在伊犁者皆察出

送還而逸賊阿睦爾撒納逃入俄羅斯患痘死

高宗純皇帝命理藩院移文俄羅斯撤納特衙門使送賊二十

三年正月俄羅斯出其尸於恰克圖公驗之四月厄魯特舍楞

害我副都統唐喀祿而逃於俄羅斯察罕汗受之以屬土爾扈

特我使索之又不與

高宗怒嚴新疆喀倫絕恰克圖貿易自博羅伊察格圖喀倫至

尼布楚南七百里澤倫圖喀倫測北極東西相去二十六度以東則黑龍江舊界西爲哈撒克外藩而舍楞於三十六年誘俄羅斯土爾扈特全部趨伊犁時俄羅斯與圖理雅斯科兵爭圖理雅斯科以其先控噶爾汗失地故背俄羅斯不朝貢俄羅斯征之屢戰屢捷而土爾扈特逃俄羅斯收其地馬行東西三十日南北二十日改建他藩不復問土爾扈特所往土爾扈特至伊犁喀倫計蹙歸順諸大臣皆以納俄羅斯屬部是與兵端也高宗命理藩院移文撒納特告以伊犁本我地舍楞乃我叛人諭以大義而遂受之俄羅斯亦無他言四十四年開市五十四年復以納我逃入閉關嚴大黃出界之禁五十六年土爾扈特喇嘛撒馬林偽造俄羅斯書誘土爾扈特

論理藩院移門之撒納特衙門言偽書用印兩顆鈐蓋不合式

癸巳類稿

卷九

六

八

又非邊界頭目鈐記且請通市

高宗察其誣許通市時叩肯汗第七傳矣俄羅斯於中國不遣正使皆貿易人來附請

大皇帝安中國亦因其入谷之嘉慶十年今汗遣正使來至邊界議禮不合而返今汗者始以男汗治俄羅斯地遠禮別使命不至

皇上亦置不問也

述曰俄羅斯之不見於史也蓋有故元史地理志河源附錄後西北地名僅有阿羅思三字而丁酉歲之師又謂之幹羅思則明初人得之元遺臣者時俄羅斯方漸起故不能詳也其大也在明中葉明方與鞑靼瓦剌日構兵其款塞不過緩兵趨市苟且且夕固不能如漢唐西域北庭置都護校尉中外往來可以

從容垂訊西北遠國卽商人至邊境亦不過以尋常賈胡視之其不知之也固宜非是其人自古未嘗一至漠南也俄羅斯地大人眾天氣和藹如中國故亦有花痘之症惟沙漠行國趁涼者無之葢居國皆如此也俄羅斯有火器

平定羅刹方略言康熙二十三年正月十一日我師抵雅克薩以其烏鎗歸絕域紀略云邏軍國所遇皆檀烏鎗黑龍江外紀言其納藥箇中凹凸如梅花式鮎碯亭集晝雅薩藥府注言其國精火器異域錄言圖理琛入其境伊國具鎗礮旗幟以迎土爾扈特又借之以衛我使者今雅克薩城有康熙時獲俄羅斯礮三位則言俄羅斯無火器者非也

聖祖仁皇帝文集云噶爾丹揚言假俄羅斯火器兵攻喀爾喀豈得舉其所無以自敗哉康熙六十年俄羅斯人來言其地去

癸巳類稿

卷九

九 8. 0. 1

北極二十度以上爲北海堅冰凝結人不能至

聖祖以爲始信東方朔記北方層冰千尺冬夏不消之言不謬是其國已極北而或以其西南屬國之控噶爾汗謂在俄羅斯北且謂控噶爾能征俄羅斯又以女汗有男侍俗間小說遂謂我使侍衛碩託與其汗訂十八條議於枕席之上其說皆佻謬且亦妄得有十八條議哉土爾扈特之來歸也實由舍楞唆搶伊犁俄羅斯故置之不敢追至無可奈何而歸順我豈能拒之使必致死於我俄羅斯始聞其搶我伊犁寇發自彼不能止之及其歸順則又望我興數百萬師徒盡執土爾扈特數十萬人送還之無是理也故我於俄羅斯不爲納其屬部俄羅斯於我亦非絕置屬部於不言其勢固有所難言也乾隆二十三年閉關三十六年土爾扈特始來四裔考次之二十六年又云三十

年閉關外間小說遂謂二十年後以土爾扈特嫌絕不與通揣擬失旨此其落落大者故詳考事實著於篇咨於故實此庶近焉

癸巳類稿

卷九

辛五十七

緬甸東北兩路地形考

雲南地十四府四州三廳省治西南七百九十里曰沅江州西南千二百三十里曰普洱府西一千一百五十里曰順寧府西千二百里曰永昌府永昌虎踞天馬二關外爲緬甸緬古朱波也在唐爲驛國長三千里廣五千里西北連東天竺東有今省西北麗江大理屬土司地兼野人番獯怒夷宋曰緬元時其國東至大理西北直成都不測其地方幾千里也明初置宣慰使司嘉靖時孟養滅之後復興東并木邦孟良南并洞吾北并孟養孟密孟拱其人_蓋有得楞普潞洞吾擺古等十種又以力制諸土司勢大熾號九萬里_蓋正_蓋月_蓋雲_蓋推_蓋開_蓋學_蓋洪_蓋疏_蓋萬_蓋曆_蓋中_蓋劉_蓋縱兵至其阿瓦城巡撫陳用賓又約暹羅夾攻之緬降立八關曰萬勿曰神護曰巨石曰銅壁曰鐵壁曰虎踞曰天馬曰漢龍

癸巳類稿

卷九

三

616

國朝順治十五年明桂王朱由榔及沐天波走永昌十六年正月走騰越二月至囊木河入緬界自蠻莫舟行達井亘五月緬人處由榔於阿瓦南赭磴白文選走木邦李定國走耿馬抵孟緬滅孟良據之沅江土知府那嵩起兵與之應我師滅沅江十七年文選以桂王拘於緬思出之自木邦興師越錫箔攻阿瓦新城將破矣爲緬所給退兵再攻不能克走孟良會定國是時吳三桂在雲南思明有後請於

朝滅由榔以戴明局移檄緬甸使送由榔十八年三桂師至孟卯三月瘴發班師五月定國文選會攻阿瓦造船於上游緬人燒之時其酋莽孟自弒兄自立國未定欲借外兵鎮壓之暗結三桂九月三桂帥師由騰越取道南甸隴川孟卯至木邦分兵出孟定之姚關十一月由鎮康孟定會木邦定國走景線文選

據錫箔江三桂一晝夜馳三百餘里至錫箔江橋斷結筏以濟
文選走茶山分兵追之至孟養文選降三桂自帥大軍至舊挽
坡去阿瓦僅六十里緬人請兵遂進次蘭鳩江蘭鳩江去阿瓦
僅十里其上游則騰越西之戛鳩江也戛鳩至老官屯下流六
日卽阿瓦莽孟白以之稟轅其大臣以舟送由椰出時十二月
朔也三桂奏凱還康熙元年四月三桂殺由榔於是我典屬所
收永昌府南孟定等地數千里爲土知府三宣撫司五安撫司
三又收普洱府南車里等十三土司地出七百五十里外乾隆
十五年緬王莽達賴入貢受瑞輯西琛額十九年莽達賴與得
楞錫箔等構兵爲所殺木梳酋長龔藉牙因有其國龔藉牙死
子孟腦立孟腦死弟孟駁立據阿瓦木梳孟密孟養孟拱孟良
木邦大古喇等十三路最南近海爲洞吾古喇北路爲孟密孟
癸巳類稿

卷九

五

密之西爲孟養北爲孟拱孟密之蠻暮新街老官屯爲阿瓦運
鹽及通市中國地直虎踞關外其東路爲木邦爲孟良孟良所
屬爲整欠孟勇整控大孟養伯諸地在耿馬土司袞龍江南
地勢稍平由阿瓦東北行過來卡卓落至大山宛頂再三曰則
永昌西南孟卯土司也莽者緬之孟良路也緬言君長曰莽紀
故孟良長亦曰莽莽女曩占嫁楮硯緬曰古利宴古利宴者其
先中國人從明桂王沒於緬緬單字還音號爲桂家者也二十
三年曩占勸之起兵攻奩藉牙敗而逃於外土司孟連孟連欺
古利宴孤弱凌之曩占怒二十八年秋燒滅孟連而自歸於中
國永昌府知府楊重穀與武弁謀申言蠻反討平之遂置古利
宴於極典以邀功曩占駭痛逃歸孟良三十年孟良酋長孟容
爲其姪召散所拘時孟駁新立召散據孟良而孟容子召丙逃

入孟遮召散追之破孟遮三十一年並擾普洱府南九龍江檄
檀壩諸土司當是時邊報警居民一日數徙皆曰莽子來也是
曰莽匪我師滅之召散逃歸阿瓦我檄索之不與我師征孟良
曩占旣怨永昌又恨緬甸欲得罪

天朝遣使乞濟師緬命木邦助之木邦亦莽也以莽復孟良諸
土司軍報題以木匪在事諸臣憤憤不知其卽緬甸也旣而木
邦叛緬緬滅之曩占所滅孟連土司曰刀派先者逃入中國
自供緬之支裔守臣不以入告至是緬匪以兵來索孟連

高宗命復訊之始知莽匪木匪皆緬匪遂定議征緬阿瓦先後
在事者劉藻楊應琚劉德成哈爾興阿華封朱崙李時升趙宏
榜等收復諸土司又收普洱南車里外孟良整欠孟勇整賈景
線六本景海順寧南孟連孟撒永昌南孟育耿馬元江西南孟

癸巳類稿 卷九

重 卅八川

龍補哈新土司繳外地四五百里入版圖又收緬北野人三十
二年木邦大山巒暮亦內附我師進駐新街於是緬地十三路
亡其三勢急遣使議納款而又別遣兵入犯欲脅和我師出鐵
壁關緬卽北行闖入萬勿關與我師相尾滋擾永昌騰越之間
無寧日旋又陷新街巒莫我師退居銅壁關緬請權罷兵互市
不許我師進復新街巒莫壓緬而軍而緬復東陷木邦在事諸
臣皆惶懼

巖旨詰問則皆奏報失次於是易帥以承恩公明瑞爲總督鄂
寧爲巡撫而明瑞帶將軍印木邦參贊珠魯訥從將軍由錫箔
攻東路北路參贊額爾登額分兵由孟密自老官屯期會阿瓦
將軍自木邦入過曰小破蠻結過革隆山之天生橋至宋賽而
因宋賽爲賊柵最嚴處屢攻之不克貴州卒王連者騰上肉薄

拔其柵眾進連拔其十六柵守之而總兵索桂失天生橋緬自
蠻結趨木邦軍償參贊自剄死北路軍至老官屯無陸路
不能入退至早塔時屯糧於宛頂接應將軍而木邦路不開內
土司俱被擾有緬兵北路師至孟卯南行路不達折而東南行
赴將軍將軍既不能入又不得兩參贊信取道孟弄東退總那
亥孟籠象孔大山趨木邦又不達則縻孟腊至宛頂緬匪則萃
木邦蠻結早塔之眾於宛頂三十三年正月將軍力戰受重傷
自縊死按察使楊重英於木邦被遮居於緬寺五月將軍柩至
京

高宗以額爾登額徒欲自全師以出可以謝責擁勁旅緩行置
將軍於度外睨視其死而陷其軍士也比謀反大逆置極典並
斬提督譚五格緬知賈禍大竭力增兵以備我使擺夷轉達書
癸巳類稿

卷九

十四

八八

請罷兵又附書被遮官兵請和

高宗命大臣阿里袞阿桂阿思哈舒赫德等馳往經理戰備發
健銳營火器營兵四千荆州成都滿洲兵四千索倫兵三千吉
林兵一千新滿洲兵一千厄魯特鄂倫春各三百赴軍營三十
四年二月大學士公傅恒請行即以傅恒爲經略阿里袞阿桂
爲副將軍出銅壁關討賊時野牛壩舟師亦集遜收孟養孟拱
二土司而南至新街三路師會緬來逆大敗之進至老官屯阿
桂哈國興等又敗之緬人固守老官屯副將軍公阿里袞以疾
卒於軍經略以地險水師亦不能入也以禍福諭緬首緬目渺
茫莫報曰願以兩軍適中地築壇受要約及期意變哈國興單
騎往與之言言未畢渺茫莫已去經略又病足退居銅壁關
高宗以西師開拓二萬里不藉緬甸一隅之功且當

國家全盛之日曲赦緬罪緬亦不敢輕量中國又百餘年教養將士不忍以之嘗試毒癘也

諭經略使罷兵適經略於銅壁關見緬甸正使具陳悔畏且餽經略禮幣約入貢遂

詔副將軍伊勒圖阿桂班師還孟拱土司渾覺於關內襄關外地阿桂以定邊右副將軍雷雲南經理之而緬背約不入貢不送出被遮官兵三十五年老官屯目諾爾塔移書索木邦蠻莫孟拱三土司副將軍下文書切責之緬復留我都司蘇爾相高宗以緬甸詭計知我兵限於天時地利不可深入故激我興師而坐收其利

赦阿桂於秋冬閒酌遣偏師擾其邊界使之奔命不暇於是時時小出師征緬而緬方南向用兵暹羅三十六年三月阿桂請

癸巳類稿

卷九

三

八一

大舉征緬得

旨嚴飭革職以溫福代之是年金川反溫福阿桂皆赴四川置緬匪值孟駭亦死子贊角牙立四十二年兩金川平贊角牙懼多請入貢送楊重英蘇爾相求出開關貿易四十二年送蘇爾相出而楊重英不至緬甸風俗柔悍多詐其樂若唐時沒弛彌十二曲近樂器接內兜達呼嚕灣斜枯聶兜姜聶聶兜姜結莽聶兜布其音啞嘶聞其音知其人亦其地氣盤鬱沮洳使然也緬東爲蒟蘆廣南南爲暹羅物產略同向時老官屯海鹽煙魚足自給其象牙蘇木翠羽碧礪玳瑁翡翠玉蔥玉棉布羽毛緞布大小呢碎花洋錦碎花印花洋布糖青及波龍老廠新廠之銅恃雲南官采買及商販買者自用兵關閉其南海道販出價又賤蒟蘆國又以茂隆銅廠輸中國中國銅益充緬加戍東北

而力戰東南其用日細大學士公阿桂大學士伯李侍堯馳往
震勘邊界於永昌潞江土司順寧緬寧廳安守兵長坡廣岫散
漫蜿蜒則七隘八關扼其要姦細益不得出入於是瘴煙黑水
之鄉人知安處而緬亦毒焰盡經用曠竭百姓愁怨矣四十七
年其酋孟魯殺贅角牙而自立國人又殺孟魯立孟雲孟雲者
甕籍牙第四子少爲僧緬寺孟駁父子之事皆不與知國人立
之而值暹羅之難暹羅國騎長居緬西南海其人裹人腦骨曰
聖鐵騎象而戰緬於乾隆三十六年滅之鄭昭者中國人也乾
隆四十三年暹羅遺民憤緬無道推昭爲王乘緬匪抗拒中國
人傷財盡之後盡復舊封又與師占緬地贅角牙爲所困者屢
矣暹羅於四十六年入貢陳其事不使亦不止也四十七年鄭
昭子華嗣華亦有武略孟雲不能支乃東徙居蠻得五十一年
癸巳類稿

卷九

庚

8011

鄭華受

封孟雲懼五十三年由木邦齎金葉表入貢送楊重英等出

高宗哀憐之諭暹羅罷兵五十五年使賀

八旬萬壽受

封爵許通使定十年一貢嘉慶十年秋暹羅貢表又言方出師
攻緬得勝

皇帝頒敕諭解之冬緬甸叩關求入貢蓋乞救也疆吏以非貢
期拒不納而緬已削弱矣

述曰緬甸之猖獗也一在索土司於內地一在抗拒官兵不輸
誠歸款而用兵脅和悉索財賦糜爛其人民失大援遂爲鄰國
所窺伺也嘗綜乾隆年間用兵地大如準噶爾回部險固如金
川皆摧破其始皆覆育生全之及其再叛始行芟夷安南亦猖

緬與緬甸同一旦悔悟親入朝遂蒙

赦宥而卒以阻兵之故國內空虛爲粵南所并緬甸則困極然始歸命蓋初亦自念重罪不可赦故鋌而走險豈知入貢以後天朝之所以勞之來之者爲緬甸之所夢想不能及者哉故不觀於安南緬甸之撤兵不足與言安邊之

睿謀不觀緬甸安南兩次之受降不足與言不嗜殺人之

聖德與準噶爾回部金川之自取滅亡是以求其事比而論之緬甸自古稱險阻阿瓦之蘭鳩江上爲夏鳩江亦曰大金沙江亦曰檳榔江其上游由工布逕雲南出鐵壁關瀾滄江則由察木多入雲南車里下爲九龍江出緬甸東其潞江則由衛入怒夷逕雲南永昌入潞江土司龍川江亦由喀木逕雲南漢龍關入緬其水與衛藏爲首尾老官屯者特阿瓦運鹽之道上下游

癸巳類稿

卷九

毛

b上b

俱斬絕乃其國不爭之險也江之東爲木邦爲孟艮江之西北爲孟拱孟養南爲木梳阿瓦諸路由順寧永昌南孟定土府而南至其東路由騰越西渡戛馬至孟拱孟拱東孟密夾江而下東北則蠻莫西南則老官屯老官屯前北路參贊及傅文忠與緬戰處蠻莫乾隆三十四年阿文成造戰艦於此當時謂之野人壩者也三十三年文成言其地崖險徑窄斷難行船或言蠻莫江由新街下西流入大金沙江是桂王舟路非必容樓船大艦也讀史方輿紀要云麓川寄箭山滇略言過此盡平地一望數千里絕無山溪亦無果樹是野人壩以西亦沙漠地行金沙者至阿瓦北井梗卽陸行過者梗半日程卽達阿瓦夫阿瓦能制孟密孟拱孟養則三路者亦必有路以達阿瓦矣誠能舍老官屯覓路搗阿瓦亦功名之盛也劉縱嘗由姚關隴川至阿瓦

而王驥追機思發僅刻石大金江邊白文選李定國吳三桂入
緬至阿瓦城下則皆由東路意以地勢易馳騁故歟用依舊邸
抄輿地考四裔考大臣傳及志狀鉤稽推排記其出入緬甸地
勢大略具矣

癸巳類稿

卷九

美

三十一

蓋地論

元史天文志云札馬魯丁造西域儀器廓資依阿勒資漢言地
里志也其製以木爲圓球七分爲水色綠三分爲土地色曰明
史天文志亦云西洋人言地圓按地圓古蓋地說也回回西洋
亦知之耳玉海引書緯帝驗期云西王母於大荒之國得蓋地
圖蓋舜德遠來貢之自皇甫謐改作益地圖初學記引學者
證帝王世紀遂不通究其義周髀算經云天象蓋笠地法覆槃極下地高滂
沱四隕而下則地本圓在天空中素問五運行大論云地者形虛
者精精彩之動猶根本之與枝葉黃帝曰地之爲下否乎岐伯
曰地爲人之下太虛之中者也帝曰馮乎岐伯曰大氣舉之也
風寒在下燥熱在上濕氣在中火游行其間故燥勝則地乾暑
勝則地熱風勝則地動濕勝則地泥寒勝則地裂火勝則地固
癸巳類稿

卷九

元

八十三

月令正義引考靈曜云四表之內並星宿內總有三十八萬七
千里天之中央上下正半之處十九萬三千五百里地在子中
注云地厚三萬里下遊則地上畔與天中平上遊則地下畔與
天中平是證地在太虛之中文字自然云樸至大者無形狀道
至大者無度量故天圓不中規地方不中矩夫天誠圓中規始
能運地則橢長事類賦注引姚信昕天論云兩地之說下地即
上地之根也天北行乎兩地之間耳書正義云渾天者地在天
中天周於外日月初登於天後入於地天繞地明矣則渾天亦
同蓋說蓋說亦有不同易晉云明出地上明夷云明入地中大
戴禮曾子天圓云如誠天圓而地方則是四角之不掩也嘗聞
之夫子矣天道曰圓地道曰方呂氏春秋圖道云雲氣西行云
云然冬夏不輟水泉東流日夜不休上不竭下不滿小爲大重

爲輕圍道也水升雲而西迴也俱謂地止一面其謂地四面者
周髀算經云日運行處極北北方日中南方夜半日在極東東
方日中西方夜半日在極南南方日中北方夜半日在極西西
方日中東方夜半極北以極南準之此方夜半彼方日中藝文
類聚引尸子云海水三歲一周流波相薄故地動水從地下西
迴周四面也山海經云天地之東西二萬八千里南北二萬六
千里廣雅亦云然禮正義引鄭注考靈曜云地厚蓋三萬里其
疎率徑一圍三地九萬里而周亦鄭義也周末積衆人聞見人
蹟所到著於讖緯隋唐以前西域之言又與之應山海經注引
河圖玉版云從崑崙以北九萬里得龍伯國其人長三十丈崑
崙以東得大秦國人長十丈從此以東十萬里得仙人國長三
十丈五尺初學記十九河圖云三丈五尺從此以東十萬里得中秦國人長
癸巳類稿

卷九

三

100人

一丈初學記引河圖龍文云天之東西北極各有銅頭鐵額兵
長三千萬丈又有金剛敢死力士長三千萬丈天中太平之都
有都甲食鬼鐵面兵長三萬丈都甲食鬼鐵面兵卽佛說之
阿修羅佛謂之捉月羅睺一切經音義云羅睺計都此譯云障
月明史李天經議云卽正交中交行宿今俗遂以爲怪宿然語
必循其本傳聞之譌中必有不譌者今西域阿諦國男長數丈
女如中人鳴金攻之男子逃則略其婦女以歸長阿舍經亦言
修羅生女端正生男多醜則阿修羅女嫁天帝釋不足爲異而
說其人高至天能捉月與河圖言長三萬丈同一失實河圖
言長人在東佛在西見之是交周矣佛書起世經云佛告諸比
邱若闍浮洲日正中時弗婆提洲音義云前日則始沒瞿耶尼
洲音義云多牛市一日則初出鬱單越洲音義云其地爲最高正當夜半

瞿耶尼洲曰正中時此閻浮洲曰則始沒鬱單越洲曰則初出弗婆提洲正當夜半鬱單越洲曰正中時瞿耶尼洲曰則始沒弗婆提洲正當初出此閻浮洲則爲夜半弗婆提洲曰正中時鬱單越洲曰則始沒閻浮洲中日則初出瞿耶尼洲正當夜半佛告比丘若閻浮洲所謂西方瞿耶尼洲以爲東方瞿耶尼洲所謂西方鬱單越洲以爲東方鬱單越洲所謂西方弗婆提洲以爲東方弗婆提洲所謂西方此閻浮洲以爲東方南北亦然樓炭經天地成壞品云日繞須彌山東方日出南方夜半西方日入北方日中如是右旋更爲晝夜是佛家古說依周髀謂地圓也佛本行集經成無上道品云小鐵圍山並大鐵圍其間從來黑暗此之日月不能令彼處光明顯赫實著鐵圍之目開元占經載梁武帝云四大海之外有金剛山一名鐵圍山金剛山

癸巳類稿

卷九

三

八三〇

北又有黑山日月循山而轉周週四面一晝一夜圍繞環兩於南則見在北則隱武帝旣依佛作此說其臣又承制作注武帝嘗依蓋天難渾天其以南北爲隱見金剛卽北極下蓋天義也瞿曇悉達列入天體渾宗中自病其書矣初學記引河圖云黃河出崑崙山東北角剛山東則河源之崑崙墟亦曰金剛又大

地之中亦曰崑崙卽佛說之須彌在中國西北蓋天所謂天門在西北是也初學記引括地象云崑崙之山爲地首又云崑崙

山爲柱氣上通天崑崙者地之中也藝文類聚引龍魚河圖云

崑崙天中柱也曲禮正義引河圖括地象云地中央曰崑崙其

東南萬五千里曰神州博物志引河圖云崑崙山應於天最居

中中國在東南隅是西北崑崙並非河源太平御覽河圖始開圖云崑崙之墟有五城十二樓藝文類聚河圖文略同博物志

引括地象云崑崙山神物之所生聖人仙人之所集也古經史
天爲蓋天地爲蓋地史記大宛列傳云禹本紀言河出崑崙其
高二千五百餘里日月所相避隱爲光明也其上有醴泉瑤池
淮南子地形訓亦云西至三危之國石城金室飲氣之民不死
之野佛亦言須彌爲天宮佛所謂天富貴人也河圖有括地象
爲古地理書比之佛書無不合者河圖言東佛言西非圓周乎
地平上天見其半越二百五十里而極差三百六十分天之一
天則仍見其半若地非圓更無說以通之此皆隋唐以前說札
馬魯丁之製未可謂爲創獲西洋人入中國用佛義而諱其名
其儀器本之萬年回回俄羅斯當時已西接西海北接北海
又儒略等職方外紀坤輿圖說又侈陳冰海若所足履目驗者
而竟不知有所謂俄羅斯至錢少詹大斯爲定地球圖說強爲
癸巳類稿

卷九

三

納入之然則地誠圓亦非五大洲卽五大洲亦必不如西洋人
所說地之圓不圓與西洋人無涉乃世人爲皇甫謐所愚以蓋
地爲益地謂舜據此作十二州不知圖名益地在肇州之先則
名義不通並唐錢起蓋地圖賦亦不能解而以地圓出西洋驚
懾之今學者又以地圓出西洋而漫非之無怪乎耶蘇之徒自
以爲奇特也

蓋地海論

史記言鄒衍深觀陰陽消息著書十餘萬言其語闕大不經上至黃帝以爲儒者所謂中國者於天下乃八十一分居其一分中國名曰赤縣神州外如赤縣神州者九乃所謂九州也於是

有裨海環之如是者九乃有大瀛海環其外禮記曲禮正義引

地統書括地象其語亦同此古蓋地說也鹽鐵論論鄒云鄒衍

非聖人作怪誤惑六國之君以納其說此春秋所謂匹夫熒惑

諸侯者也論衡談天篇亦謂衍迂怪虛妄今案法言五百篇云

鄒衍迂而不信問道篇云鄒衍有取乎曰自持問神篇云鄒莊有取乎曰言天地人經德也揚雄據渾難蓋故不信蓋地之論而謂其言經德自持則雄所見古儒所說名理皆與衍同非後人淺見所能及史言衍終始大聖上至黃帝學者所共述大致

癸巳類稿

卷九

三

8168

隨世盛衰衍言卽非經見亦必本於黃帝乾坤鑿度云易平坤道平易注云北荒平易萬里連均夫海者三分萬形經曰坎北方無海平易北荒迷遠也乾坤鑿度黃帝書也數引萬形經又云天地宜盡閤地道距水激注云天地盡有閤激之所聖人不能測庀地道以水爲激激者盡也此鄒衍所謂大瀛海際天地也坎北方無海平易而古人近言四海者爾雅釋地云九夷八狄七戎六蠻謂之四海大戴禮五帝德以幽林交阯流沙蟠木爲四海古經言海者如此此鄒衍所謂裨海不必是禹貢之海合北方平易古文也凡一大國必有小部環之黃帝所治者大鄒衍所謂盛其後德衰齊秦相帝中國地小非司馬遷桓寬王充時中國也何反禁衍追述古初且衍熒惑何君諸儒詆衍遷怒妄也衍所說又與河圖合河圖云地廣東西二萬八千南

北二萬六千有君長之州有九阻中土之文德及而不治類聚文

引又云昆侖山應於天最居中八十一域布繞之中國東南隅

居其一分志引博物此衍之所據也其說又在蓋天王蕃渾天象說

云周徑爲蓋天者尙不考驗而乃論天地之大日月所不照陰

陽所不至日精所不及儀衡所不測皆爲之說虛誕無徵是亦

鄒子瀛海之類也開元占經引晉天文志無蕃是粗工安知奧義周髀算經

云極下不生萬物則人迹不到故乾坤鑿度云北方無海其云

地道距水澈澈爲水窮故鄒子云大瀛海環之則推而知之二

說通也意大里亞人言天下五洲中國喀爾喀西域回部西域

緬甸安南琉球日本高麗烏洛侯哈薩克以至西海又南至暹

羅越洋至噶留巴呂宋蘇祿等爲一洲意大里亞亦爲一洲又

有三洲總爲五乃不知有俄羅斯儒者不信鄒衍乃信西夷極

癸巳類稿

卷九

三

川上三

下萬物不生西夷豈能至萬形經言北方無海其是非後世必

有目歷而知之者今俄羅斯言其國北距海古人不強知之云

無海不害其爲博而篤惟鄒衍能言之嗚呼大賢哉鄒衍也

彌婁山鐵圍山考

維摩詰所說經佛國品云十寶山須彌山雪山目真鄰陀山摩訶目真鄰陀山香山寶山金山鐵圍山大鐵圍山黑山鳩摩羅什注云此十寶山雪山以下九圍統須彌妙法蓮華經序品有目真鄰陀山摩訶目真鄰陀山見寶塔品有目真鄰陀山摩訶目真鄰陀山鐵圍山大鐵圍山須彌山法師功德品有鐵圍山大鐵圍山彌樓山摩訶彌樓山藥王菩薩本事品則云土山黑山小鐵圍山大鐵圍山及十寶山眾山之中須彌山爲第一大唐西域記云蘇迷盧山唐言妙高山舊曰須彌又曰須彌婁皆諡略法苑珠林云日月所照臨處以蘇迷盧山爲中亦曰須彌亦曰迷留亦曰彌婁按此二唐僧所說未能得實須彌山亦自爲須彌婁其單言彌婁彌樓迷留者自屬目真鄰陀山言摩訶癸巳類稿

卷九

五

八十一

目真鄰陀者自是摩訶彌樓山目真合音爲彌鄰陀合音爲樓非須彌也維摩詰所說經言黑山大小鐵圍山在十寶山中法華藥王菩薩品則三山在十寶山外疑是法華文誤也鐵圍山者樓炭經天地成壞品云日月城郭繞須彌山大鐵圍山泥犁品云有大鐵圍山復有第二大鐵圍山中間杳杳冥冥其日月大尊神光明不能照及佛本行集經成無上道品云小鐵圍山並大鐵圍其間從來恒常黑暗未曾見光此間日月不能令彼處光明照耀顯赫立世阿毘曇論云大鹹海外有山名曰鐵圍周迴三十六億一萬三百五十由旬故佛多以須彌鐵圍並言佛說五菩薩句經云百億須彌山百億鐵圍山以其名顯故極言之鐵圍有二山須彌止一山故知彌樓摩訶彌樓是兩目真鄰陀不得以彌樓爲蘇迷盧之首略謂有兩須彌也須彌佛說

在地心中起世經言崑崙山爲閻浮提洲地之中心須彌山爲四洲中心鐵圍山在四大海外長阿舍經言四洲地心卽須彌山海外有山卽是大鐵圍維摩詰所說經秦僧肇注言須彌山卽金剛山秦言妙高開元占經天體渾宗引梁武帝說則云鐵圍一名金剛又云金剛山北又有黑山日月循黑山而轉黑山在十寶山數晉譯方等般泥洹經北齊譯大悲經隋譯大威燈光仙人問疑經俱別列黑山今俗說黑山卽鐵圍山非也黑山雪山香山俱大山佛國所謂十寶山華嚴經二十二謂之天地十大山釋迦氏譜引西域圖經云五天竺國北洎雪山南洎大海六萬餘里又引閻浮圖云葱嶺西據香山東南懸亘至於蜀都此閻浮圖蓋釋家所作

由旬義

佛本行集經角術爭婚品云婆羅極义十溝也其數目溝壤穉
垓京兆億萬千百十一以微塵起一遞七乘之爲嚮塵爲兔塵
爲羊塵爲牛塵爲蟻爲蝨爲芥子爲大麥爲指節爲半尺倍之
爲尺二尺爲肘四肘爲弓五弓爲杖二十杖爲息八十息爲拘
盧舍八拘盧舍爲由旬是以八千弓爲拘盧舍六萬四千弓爲
由旬唐慧苑華嚴音義十定品云三百弓爲里四里爲俱盧舍
則以千二百弓爲俱盧舍九千六百弓爲由旬立世阿毘曇論
云四肘爲一弓五百弓爲俱盧舍八俱盧舍爲由旬俱舍論云
七麥爲指節三節爲指二十四指橫布爲肘豎四肘爲弓五百
弓爲拘盧舍大唐西域記云五百弓爲拘盧舍八拘盧舍爲踰
繕那則以五百弓爲俱盧舍四千弓爲由旬西域記又云由旬
癸巳類稿

卷九

三

八上

三十里爲印度國俗正曰踰繕那其由旬由延踰闍那皆論略
放光般若經云由旬三十里根本說一切有部尼陀那注踰繕
那當三十里欲令易了故有言驛之處是三說皆以三十里爲
正義秦僧肇維摩詰所說經不思議品注云大由旬六十里中
由旬五十里小由旬四十里翻譯名義集選云由旬三别大八
十里中六十里小四十里元應一切經音義云俱盧舍者牛鳴
聞五里由旬者正言踰繕那四十里是三說則至四十而極更
無四十以下之說然華嚴音義云拘盧舍四里由旬三十二里
又云準本行經由旬十七里餘二百八十餘步今按本行無積
步之法不知華嚴音義從何置算西域記云踰繕那者自古聖
王一日軍行也舊四十里印度三十里聖教所載惟十六里阿
毘曇論亦云俱盧舍二里由旬十六里是由旬有六萬四千弓

九千六百弓四千弓八十里六十里五十里四十里三十二里
三十里十七里餘十六里之別魏慧覺譯賢愚因緣經須達起
精舍緣品云舍利弗言佛行日半由旬須達卽於道次二十里
作一客舍此旁出之言有屋舍相去里數最爲明證則四十里
爲的數也

癸巳類稿

卷九

三

一〇一

